

तीतर चाकर



रचणिया : चन्द्र शेखर बेवश, ढालपुर, कुल्लू (हि० प्र०)



THARAH KARDU

-:- एक व्यथा - एक संतोष -:-

कुल्लूई भाषा-उस भाषा या बोली, आप इसे जो भी समझना और बोलना चाहें, हिमाचली पहाड़ी को एक अंग एक रूप है जिस में लिखी और छापी यह कविमय पहिली पुस्तिका कह सकता हूँ और जिसे लिखने छापने का प्रयास किया है हमारे हिमाचल के कुल्लूई रूप के एक सिने माने व्यक्ति और भाषा विद आदरणीय पुरोहित चन्द्र शेखर जी ने। काश्मीर से लेकर असम दार्जिलिंग तक हिमाचल के इस मू-भाग को पहाड़ी भाषी माना और कहा जाता है जिस में अपने-२ प्रदेशानुसार अनेक रूपों में बोला जाता है कि लिपी प्रायः राष्ट्र भाषा हिन्दी ही है, यह सिलसिला ना मालूम कितने युगों से ऐसे चल रहा है परन्तु पहाड़ों के भाग्य में आम तौर पर अपने पराए सभी के दिलों में एक हीन भावना बनी रही होगी जिस के फल स्वरूप इन बोलियों उप-भाषाओं को निज गौरव प्रगट करने का अवसर नहीं मिला और यहाँ के निवासियों ने भी राजनैतिक सामाजिक, सांस्कृतिक एवं आर्थिक पराधीनता के कारण इस ओर ध्यान देने योग्य नहीं बनने दिया। हम लोग आम तौर पर अपनी मातृभाषा या बोली में दूसरों के समक्ष बात करने से लजते रहे चाहे उनमें जीवन के प्रति हर प्रकार के भावों की अभिव्यक्ति करने के लिए इनमें शब्द भण्डार आवश्यकता से कितने ही अधिक क्यों न रहे हों। कितना दुर्भाग्य रहा है कि नाभी में कस्तूरी होते हुए भी मृग बन-२ दूँडता फिरता रहा। यही एक कामना थी जो मेरे मन में तब से काँटा बन कर खटक रही थी जब आज से संभवतः चालीस वर्ष पूर्व कुछ पहाड़ी मित्र लाहौर कालजों में पड़ा करते थे। यह कामना घीमी-२ कसक बर्ना दिलों में चुटकियाँ लेती रही साल हा साल और तब एक समय आया जब भारत माँ के पाँव की पराधीनता की बेड़ियाँ कटी-एक प्रकाश अपने संग सैकड़ों हजारों आशाओं की किरणें समेट चहुँ दिशाओं में फैकना आरम्भ हुआ..... उन में एक किरण इस आशय की भी कि अब हमें अपनी भाषा और संस्कृति को न केवल प्रकाश उस प्रकाश तक पहुँचने में सहामता मिलेगी वरन् हम समस्त पहाड़ी जनता को सभी प्रकार की अवनती से छुटकारा मिलेगा और हमें स्वाभिमान की इन मृदुल, सरस, शान्तिप्रद किरणों के प्रकाश में अपने जीवन को उभारने, निखारने और प्रखरित करने का सौभाग्य प्राप्त होगा। और सचमुच ऐसा हुआ भी। काश्मीरी, डोगरी, पहाड़ी, किश्तवाड़ी, हिमाचली पहाड़ी और उस के

अनेक आंचलिक रूप, गुजराती, नेपाली, गढ़वाली, भोटी आदि बोली भाषाओं में जीवन की एक मधुर लहर जागृत होने लगी। भाषा विभाग बने, आकादमियों ने जन्म लेने आरम्भ किये और प्रकाश की हर नवीन किरण ने पहाड़ों के सांस्कृतिक जीवन में एक नया उल्लास अनोखी तड़प और धड़कन गूंजने लगी। साहित्यकार, लेखक, कविगण संगीतज्ञ, नर्तक आदि सब की रंगे भड़क उठी और समय के साज पर थिरकने लगे पांव और उंगलियों में विह्वत हो उठी लेखिनियाँ। कवि की उड़ानें और कलाकार की सुरताल में संजोई ताने स्वतः शतशः कल्पनाओं को जनम देने लगी। पहाड़ी जन समाज को शायद पहिली बार यह एहसास होने लगा कि हमारी भाषा, कला और सांस्कृति में वह सभी कुछ है जो एक सभ्य समाज के पूवजों और पुरखों की अनमोल भाती कही जा सकती है। और जिसे हम अनभिज्ञता और विवशता के कारण भुला बैठे थे।

चालीस वर्ष पहिले की वह व्यथा शनै-२ हर्षोल्लास में बदलने लगी। पुस्तकें प्रकाश में आई, लेख लिखे गए, कविताएँ हृदय के मन सरोवर से धाराएं बन कर बहने लगी जिसमें से एक धारा हैं यह पुरोहित चन्द्र शेखर जी की पुस्तिका "तीतर चाकर" जिसे वे आप को भेंट करने चले हैं। कुलूई बोली में भी बहुत कुछ लिखा गया है कालेज के होनहार विद्यार्थीओं में भी अपनी बोली के लिए सुन्दर और अदभुत भवनाएं जागृत हो उठी और कालिज मैगजीन उन की सुन्दर कल्पनाओं को अभिव्यक्त करने लगे। परन्तु पुरोहित जी की बेबसी ने इस पुस्तिका के माध्यम से यह साबित कर दिया कि वे असल में किसी प्रकार भी "बेबस" नहीं हैं हां इतना अवश्य है कि उन के अंतराल में कुलूई शब्द भण्डार और उनको हर प्रकार के छन्दों में ढालकर हिमाचली व कुलूई समाज के समक्ष लाने में प्रत्यक्ष रूप में बेबस रहे वरना उन के बस में तो कविताओं, टप्पों, गीतों आदि का एक अथाह समुद्र है जिस की लहरें साहिल से टकराती रहीं और वापिस निराश जाती रही। यह उन्हें इस बेबसी को तोड़ने का पहिला मौका मिला है। मुझे मालूम है अभी उन के पास लेखों, नाटकों एकांकियों की भी कमी नहीं है जो लिखे पड़े हैं परन्तु जिन्हे प्रकाशित करने की उन की बेबसी बनी हुई है।

प्रस्तुत कार्य कैसे सम्पन्न हो सका यह उन्होंने स्वयं अपने पुस्तिका आरम्भ में दिया गया हैं जिसे दुहराने की आवश्यकता नहीं और हमारा कर्तव्य अब हमें पुकार रहा है कि हम पुरोहित जी को भविष्य में बेबस न रहने दें - यही नहीं दूसरे

साहित्यकार मित्रों और प्रियजनों को भी प्रोत्साहित करने के लिए कटिबद्ध हो जाए और यह हो सकता है अपनी बोली भाषा के प्रति सम्मान और गौरव की भावना हर एक कुल्लू निवासी भाई बहनों के दिलों में उत्पन्न करने से ।

कुछ और सज्जनों ने भी प्रयास किये हैं परन्तु जो बात मैं कहे बिना कदापि नहीं रह सकता वह कुल्लूई कविताओं को अनेक छन्दों में सभी रसों में एवं भावाभिव्यक्ति में सुन्दर, अनूठे और रहस्यमय सार्थक शब्दों के चयन में जिन्हें यदि ठीक लय और शास्त्रोक्त छन्दों के अनुरूप पढ़ा जाए तो बस आनन्द ही आ जाता है । साहित्य में छन्द लय और सार्थक शब्दों के चयन की उत्कृष्ट कला में प्रवीण शायद ये दूसरे व्यक्ति हैं । काङ्गड़े में पं० दुर्गा दत्त शास्त्री इन से पहिले एक संस्कृत नाटक को उन्हीं छन्दों में बांध कर प्रस्तुत कर बैठे हैं ।

बेबस के बस में अभी बहुत कुछ है । इन के इस कार्य को ऐसी कुशलता से प्रकाश में लाने के लिए वे बधाई के पात्र तो हैं ही, हम चाहते हैं उन का जितना लिखित साहित्य बाणी है उसे प्रकाश में लाने के लिए आप स्वयं तथा साहित्य कला संगम कुल्लू को सहयोग और सहायता प्रदान करें— यह मां सरस्वती की आराधना से कम नहीं होगा । “साहित्य कला संगम” कुल्लूई संस्कृति, भाषा एवं कला को राष्ट्रीय एवं अंतर-राष्ट्रीय स्तर पर आगे लाने का दृढ़ संकल्प कर बैठा है और उसमें अग्रसर है इस आपके वरद हस्त और आप की शुभकामनाओं की आवश्यकता है सफलता के लिए ।

जहां पुरोहित जी का कार्य स्तुत्य है वहां हमें एक खेद अत्यन्त अखर रहा है कि प्रकाशन में शब्दों का रंग रूप सफलता की कसौटी पर पूरा नहीं उतर पाया, प्रूफ देखने में भी कमी महसूस होती है - पाठक इन्हें क्षमा करें - कुल्लू में यह पहिला प्रयत्न जो हुआ ।

चालीस वर्ष पूर्व की वह व्यथा - और अब थोड़ा संतोष -यही इस पुस्तिका के प्रकाशन की कहानी है ।

विनीत : लाल चन्द प्रार्थी

नोट : मेरे इस प्रस्तावना को हिन्दी भाषा में लिखने का कारण है । कुल्लूई में असल प्रस्तावना तो श्री 'वेब्स' ने स्वयं लिख दी हैं जो कुल्लूई भाषा बोली को भली प्रकार जानने में समर्थ हैं और उस से अधिक लिखना आवश्यक भी नहीं । मेरा यह साहस है उन पाठकों के प्रति जो कुल्लू में जन्मे ना भी सही तो जो अपने आप को कुल्लू का मानते है, जिन्हें कुल्लू से प्यार है जो कुल्लू के हैं और बने रहना चाहते हैं परन्तु अभी इस बोली भाषा से थोड़े अनभिज्ञ हैं । उन्हें इस प्रकाशन का महत्व, इस के रास्ते की कठिनाईयां और हमारे भविष्य के कार्यक्रम का पता लगना चाहिए ताकि वे भी इस वांछित कार्य में हमारा हाथ बटाने के लिए साहस और उत्सुकता के लिए साहस और उत्सुकता से आगे आए ।

प्राची

दूई बोल तीतर—चाकर

ऐ नाँ सा एई पोथूरा, जुण तुसर होथा न सा, कीबे जे एता न थोड़े जोहै गीता न टप्पे सी आपू गौंठिए भोरेंदे, आखरें कुल्लू तसीले री बोली न कथा पढ़ाऊणी, परख्यान लामणा, बाम्हणू, भौंऊंरु सौंघे नाटी री भीठी भाखा ता इधी भावना आली गीता ता छूढी थी, पर एसा बोली न लिखणे छापणे रा जतन नी हुआ, एसी गलौ म्हारी बोली रे बोल लिखणे, खुंघणे, बाचणे ता फियाड़ने रा लोका नै वश नी आथी, एतेरा कारण ऐबी थी जे ओखले लोक बुहारान पौहले टांकरी है चौला थी, सौ बड़ी धाउड़ी लखाई सा, फीरी उडूँ आई, तेसान बी तीना सीभी बोल ढौकणे ता चुएडने री समरथ नई थी आथी हिन्दी रे देव नागरी आखर ता सी सीभी गला लिखणे नै ठीक पर तेते री बी खरी जाणकारी लोड़ी तनै बी भियासा बाभी चू घोदें वाचीद नी आथी एको पाली बाचदेआ मूंडा न दाह चैकिया सा पर बीऊ जीऊ आगै पौढ़दें जाणा तेतरा है बोहू फियाड़िया बी सा ता मजा बी एजा सा ।

सीभी न पौहले ईसाई धर्मा आले आपणा प्रचार पोथू कुल्लू री बोली ता हिन्दी आखरा न छपाऊ थी, सौ आसो बड लोभा चाउ सौंघे पौहू थी । १९१७ री बीरशा न सौहरें रे मिडल स्कूला आले ता १९४१—४२ जगसुखा आले आपणी बोली न नाटक केरे थी, ते बी लोका नै बड गौमै थी । अंदे है गीता टप्पे रा एक पोथू गश ल आएं रे ठाकर नीमत रामे आपू गौंठिए आपू छपाउ थी सौ बी देश सुधार ता समाज सुधारा पांछे बड़ा शोभला थी पर किचकी तंडा है गोभुआ ।

मैं बा पता नी सन् १९१२ रे वोट रे सौकें किछ टप्पे गौंठिए छप ऐ थी तिनरा बड़ा शोभला परभाओ हुआ । तीना वाचीए राजा रघुवीर सिधे ता होरी खरें खरें लोकें मूँनै नाम बी धीने थी । तदी न पोर पं० लाल चन्द प्रार्थी होरें मास्टर नेसूराम होरें ता मैं बी लीखे ता केरू छूढा पर आगै पंजाब सरकारें सौ लेखे नी पाऊ हां आपणे तीउरें कई नाटक कथा ता गीत टप्पे लिखें केरू नाटक ता ग्राहुंजी केलहै नी सौहरा बजारा स्कूला ता कला केन्द्रा न सरीखे है । ते सारे देश दुहारा —समाज सधारा ता सरकारो परचारें री लैयें लिखे थी ।

कुलू री बोली रा नमूना मैं कुलू सौहरें रे भूमिऐ लोकें री है बोली पांछे डाहू कीनो जे व्यास, शार्वती, गड़सा, सरवरी बजौरा घाटी सौहरा न है सीडिया सी ईना घाटी जे हुणने रे आंगी-आंगी लहजे सी तीना सीभी रा मौंभ सौहर है सा । सौहरें री बोली सा ता गडमड जरूर पर मैं खालस है काइम डाहणे रा जतन केरुदा सा ।

आसरी बोली एक ता सा बी होखे जेहै जाकं री, सौ बी सा केल्ही जेही, मंडी न म्याऊं बलास पुरा- कांगड़ै फेटें री लूड़ी न ऐ नी जुड़दी, एसो गलै एसरा नाता साता भेत पछियाणा होरी बोली सौंघ नी हुऐ, रटांगा पोरें ता भला भोटी है बोली पौई, एसो गलै सिभ गुणा होदेंआ बीएसरी कदर कीमत नी पौई ।

जबे आसो हिमाचल प्रदेशा न मिली होर म्हारें भिम्बर प्राथी होरा बणे तीने सारें हिमाचली रें डोंगा इंसरा न गोभुऐ दे ओखली कला ता साहित्य र खजाने तोपी कोसिए प्रगटं केरने री तौये एक भाषा बिभाग बणाऊ, भाग तेई महकमे री जिम्मेवारी बी तिना बी हैमिली, तेई भाषा बिभाग सारें हिमाचली री १३-१४ बोली रें जाणकारा ता लखारी बी शुआह ता बाल बीना, तीने सीभीए आपणी २ बोली रें कथा-गीता पख्यान-स्वांग पहाउणी आदि पराणी चीजा तोपी गेशीऐ प्रगटं केरें सौंघे आपणी २ बोली न आपणे २ लावी रें रुआज ररमा मुजब होर बी बोहू किछ लिखू, ईना छापणे रीतौये बिभाग "हिम भारती" नाए री पत्रका सीभी पहाड़ी बोली छापणे बी ता म्हारें पहाड़ री कला संस्कृति-साहित्या बी हिन्दी न छापणे री तौये सोमसो नाए पत्रका चलाई, ते हाजी बी जारी सी सी, ऐसा है सौंघे ईना सारी कला रें सग्रह आभी २ छापीऐ बाहू सारी पोथी छापो डाही दी ।

कुलू री केल्ही बोली बें बड़ावा देणे री तौये "प्राथी होरें कुलू साहित्य कला संगम" काइम केरु, तेई रा दफतर सौहरा शाहान रमणीक होटतना कौछें सा । पर किछ अंदा बुझिया साजी म्हारें लोक फंशने रें ब्याने न उडिऐ घटक-मटका आली पत्रका उपन्यास कहाणी पौढीऐ है मन भलाणा चाहा सी । आपणे लावी ता बोली रा चम-त्कार दर्शाने न किछ लोजिया सी ।

ऐ लौजीणे आली गल किछ अंदा हुई साजी आसरी कुलुई बोली है लागी सा बोगड़ी दी, एसरा रूप ता मान मूल लागा घटदा, लोका देशी गला न बी ओवा सुध उर्दू-पंजाबी ता अंग्रेजी रा ढाब पायं बोली रा नाश लागै केरदें तुहार लागे बगाड़द, ऐ कोई शोभली गल नी आथी हिन्दी रा मान कुण नी केरदा ? पर ऐसा कुलुई रा मान कुणी केरना ?

जबे आसो आपणी बोली धीरें भालू तबे पता लागी जे म्हारी बोली ता बड़ी शाहू कार सा आसो तुलसी रामायणा ता संस्कृत री कई पोथी रें टुकरै रें चुएड़े आपणी बोली न

केर ता बोल शब्दे री को तंगी नी बुभुई थोड़ नसूने एई पोथू न बी सी इना असल पोथी सँघी मलाले ता पता लागणा जे आसै कोई चीज छौड़ी की बगाड़ी नी आयी । तढा है आपणी बोली न सीभलीखी सका सी सीधा आपणी बोली री रांभड़ी जानकारी ता हिन्दी आखरे री शोभली पछियाण लोड़ो तबै आसरं कूलू री केतर केही गला लिखणे नै छूठे बखारी निकली सका सी ।

एई पोथू रं गीता टप्प किछता नाटी रं ताल भाखा न गाणे रं ता किछ सी शास्त्री छंद, ऐ होआ सी बाभी गाऐ शणाणे री कविता ए गौठणे ता होआ सी करडै जरुर पर जने ईना बाचणे रा ठंग सई आऊ ता मजा बी बड़ा एजा सी कीबै जे ए कवित छंद बिलकुल शास्त्रा मताबक सी बणाऐ दै जेतर आखर एकी पाली न होआ सी तेतरै है पीछे तैयें सीभी पाली न होआ सी ।

शास्त्री छंदा न मै बोहू जेही गीता एसो गलै लीखी जे उई न सी अकली बुढ़ी री गला ता ज्ञाने री आसरं देशान गाण गा सी शौकी री नाटी नोचणे री तैयें, तेता नै लोड़ी होआ सी चटपटी ता चुड़ चुड़दी गीता, दूजा हाऊं गायै शणाई नी सकदा तबै मै एई पोथू रा नां “ तीतर-चाकर ” डाहू ताँढो तर्ज सा इना छंदै री । लोमी-३ पाली आलै छंद एई कारणे पाऐ जै तीना न बोहू मतलब औपड़ा सा ।

ईना छापणे बै किछ हिमाचल सरकारै (भाषा संस्कृत विभाग) ता कूलू री साहित्या कला संगमे मू' बै शुआह ता मजत थाने, एसो गलै मै मूल बी थोड़ा डाहू । दूजा मै ऐ वपार गजारें नै नी छापी, हाँऊ चाहा सा बोहू लोक पौढ़ा न ता आपणी बोली न आपणी ता होरतै री गला बी लिखीऐ प्रगटी केरा न । ता आपणे तीतरा-चाकरा बै भूरा न । ऐ भेट मेरी कूलू रं लोका नै सा ।

तूसरा आपणा माणू

चन्द्र शेखर वेबश, ढालपुर, कुल्लू (हि० प्रदेश)

-१- कुण कौखे -१-

गिणती	गीता रा नां	पोतरा	गिणती	गीता रा नां	पोतरा
1	रगनाजी री प्रार्थना (भज	1		भरियाली री बधाई	
2	राम गीतावली रा एक गीत	2	20	बजोगणी री चौठी लाड़े बें	41
3	कृष्ण जी री स्तुति	3	21	निहारखी रातीऐ	43
4	कृष्ण जी रा जनम ध्याड़ा	3	22	बजोगी री दुआसी	44
5	राम गीतावली रा गीत-२	4	23	चतर मासी री राती	45
6	भारत वर्ण री सराहुती	5	24	नुआरें ताल	46
7	नुआरा हिमाचल	6	25	बेउरा	48
8	गांधी	7	26	मनाल करड़ी	50
9	गांधी जी रें ग्यारा वरत	9	27	देश पियार	52
10	गीता रें स्थित प्रज्ञमागूह	10	28	आसौ जागें	52
11	जपु जी साहब रें किछ शब्द	12	29	देश बणाणा	53
	राजे रघुवीर सिधैरा मोरन	14	30	आसौ हिन्दुसतानी	54
12	तुलसी रमायणे रा एक टुकड़	14	31	जीने रा हंबला	55
13	तुलसी रमायणे रा राम		32	पंचायती राज	56
	जन्मे रा दूजा कारण	26	33	बेटड़ी पंचा	57
14	जवाहर जोत	32	34	छुंघ छेड़	58
15	जुगनू जीजू	32	35	ढौत	60
16	फौजी वीर	33	36	बणाहड़ी रा सप्ताह	60
	माणू री जात	35	37	मशीनी खाद	62
17	औउ री सौउखी	36	38	बीणेरी फराध	63
18	मेरो ढौकणू डालीऐ	38	39	खबर दार	63
19	सौत टप्पें		40	नशा	64
	कवि री भाभ-२० आपणी कथ-२१		41	परुमारें रा स्हाब	64
	जोमण मोरन-२२ सुख दुःख-२३		42	घोरु लड़ाई	67
	लोभी री आद-२४ दाह-२५		43	खापरी शोहरी	68
	मनी री वेदण-२६ तेहरवां महिना		44	बचणे री सलाह	68
	दोलतु री चौठी ठाकरी वो लिखू थी,				

कुन्त के महाराज श्री रघुनाथ जी की

प्रार्थना १

जय परमेश्वर सिरी रगताजी,

सारी बिदरा लोड़ी राजी । जय परमे०

तेरा उच्छव विजय दशमी ।

जुग जुग डाही ऐसा रसमी ॥

सदा जिउं जिउं फेरी ऐसा ताजी । । जय०

जै जै ठारा करडू देऊ ।

रुड़ रोग दुख लोड़ी नेऊ ॥

मुलखै लोड़ी जीती बाजी । । जय परमे०

तू सा म्हारा मालक ठाकर ।

आसै तेरै तीतर चाकर ॥

बेवश कोलै दूहै सराजी । । जय परमे०

धन महाराजा तेरी भांकी ।

कमल संघासन शोभा बांकी ॥

सीता याजी हनुमत गाजी ।

जय परमेश्वर सिरी रगताजी ॥

श्री स्वामी तुलसी दास रचित राम गीतावली की अन्तिम कविता कुलुई अनुवाद

कविवन्त छंद ३१ वर्ण-२

रघुनाथ तुसारै चलितर सी कंदै बांकै गांदै सदा रौहंदै अजुधयारै बासी सी,
खुद परमेसरै ऐ माण्डू रा तुआर धारू बडै मना आलै तूसै ब्रह्म अविनासी सी ।
जग थी बचाऐ तूसै ताड़का सुबाहु मारे खुशी हुऐ ऋषि जुण तपोवन बासी सा,
शैल थी जै हुईरी शरापै लायै ब्राह्मणी सौ तारी धीनीभाली जबै तेसरी दुआसी सी ॥ १

सीभी राजै लोकै रा घमंड तूसै भौनी शेटू शिवजी रा बडा भारी धनष मरोड़िऐ,
आऐ तवै घौरा तूसै जनकै री जाई सैंधै चांडू पर्सरामे री ता चांडा आऐ चोड़िऐ ।
बापू जो री गल मनी ऋषियां रा भेष केरु आऐ चित्रकूट तूसै राज काज छोड़िऐ,
डाह्री एक हौखी राजै इंदरै री बेटै री ता भौख काटी ऋषि री विरधा मारी लड़िऐ ॥ २

पंचवटी रामजी करुण सूपनखा केरी मारै खर, दूबण, मरीच, गिधा तारी ऐ,
मारिऐ कबंध सुगरीया सैंधै मेल केरु बीन्ही शेटू ताल सैंधै बाली शेटू मारीऐ ।
बीन्ही ऐ समुद्र भालू बांदरै री मजतीऐ, लक्षमणा सुधजम आपणा खलारिऐ,
मारी खानदानी भाई बेटेआं समेत मारु रावण ता देवतै रै दुख शेटै टारीऐ ॥ ३

बडा भला माण्डू तेई बुझिऐ बभीषणा बै लंका पुरी मौंभै राजतिलक चढ़ाड़िऐ,
सीता होर लछमण आणे आपू सैंधै होर जेतरेँ बी संधी थी ते सैंधै अणे पाड़िऐ ।
बेटड़ी मरध हूरै भालदै अजुधयारै सैहरा कौछै रामैरा बमान पूजू आड़िऐ,
महादेव ब्रह्मा मुकदेव होर नारद ते केरदै सतुति नई रौजदै सराहिऐ ॥ ४

सारै चौदा भुवनै रै जीउ ता परीउ आऐ नोकर ता टवरीऐ कुलराज धानीरै,
बडा है अनंद हुआ मिले भाई भरत जी दुखडै बजोगै रै बसरै मन जानीरै ।
वेद ता पुराण बाचै भौं ध्याडै राम जी रा केरु राजतिलक रूप्राज खानदानी रै,
अंदा बांका बौगत फियाड़ दास तुलसिऐ भगती रा दान मौंभू रामचंद्र दानी रै ॥ ५

कृष्ण जी री स्तुति

जे श्री कृष्णा जे भगवाना, सीभी देऊ रै देउआ ।
 एई जनमा धाचणु आलैआ, तेई लोकै रै सेउआ ॥ १
 धन धन भगवान नरायणा, देऊ देऊ शत देऊ ।
 भलै बचाणे बै पापी मकाणे बै, आपु जन्म लेऊ ॥
 धन सालै रा भादरु महीना, धन शोभली ऋतु बसांती ।
 धन औज का औठवीं ध्याड़ा, निहारी औधड़ी राती ॥ ३
 राजै कसै री कैंदी घालदै आमा बापू रे पेटा ।
 सोला कला सैंधे जनम लैइऐ, बणु आठुआं बेटा ॥ ४
 तेरै चलितर सारै संसारा न, सीभी भांतीऐ न्यारै ।
 पापी मारीए धरमी लोका तै हौथ हौथुऐ तारै ॥ ५
 जबै आसरी धौरती पांघे, पाप भोखुआ बोहू ।
 भांति भांति रै जनम लइऐ, पाप द्रुवड़ा शोहू ॥ ६
 सीभी धरम ग्रंथा नटारिऐ, कौड़ी होछणी गीता ।
 कलिजुगै रै लोका तारणे बै, ज्ञान कठेरिऐ दीता ॥ ७
 आसा बेवशा बै अकल देई, भलै लोकै री सेवा ।
 पुना धरमा न शरधा लोड़ी ता तेरै चरणा न रेवा ॥ ८

कृष्ण जी रा जनम ध्याड़ा

सारी विदरा जौणनू आला, औज तेरा जनम ध्याड़ा ।
 औज सरगै रा द्वार ध्याड़ा, कृष्ण जी रा जनम ध्याड़ा ॥ १
 कैद खाने जनम लैऊ, गोकला जाइऐ गभैऊ ।
 तौरु जवना जी रा ताड़ा, कृष्णा जी रा जनम ध्याड़ा ॥ २

चौऊ कुंठै रा जै मालक सौ दसोधा रै फाड़ै बालक ।
 बणी गैऊ बैकुंठ फाड़ा, कृष्ण जी रा जनम ध्याड़ा ॥ ३
 पूर्ण ब्रह्मा जै शोहरू आला, तेई छालदा कंस काला ।
 आपणे आपै रा बगाड़ा, कृष्ण जी रा जनम ध्याड़ा ॥ ४
 कौम याणू रै नुग्रारै, बोहू सारै राकस मारै ।
 भालना शोहरू गुआला, कृष्ण जी रा जनम ध्याड़ा ॥ ५
 पापियां री गंध मकाई, आगो बै गीता बणाई ।
 धर्म ग्रंथां रा चुआड़ा, कृष्ण जी रा जनम ध्याड़ा ॥ ६
 तू करार आपणा नभेई, 'बेवशा' बै होथ देई ।
 बौगत सा किछ आउ माड़ा, कृष्ण जी रा जनम ध्याड़ा ॥ ७
 जन्म अष्टमी पर्भ प्यारा, कुल्लू चमकू औज सारा ।
 ढाल पुर ता बहर खाड़ा, कृष्ण जी रा जनम ध्याड़ा ॥ ८
 आसा लोका बै अकल लाई, दूर केरी हाही खाही ।
 पौउ नी लोड़ी पुआड़ा, कृष्ण जी रा जनम ध्याड़ा ॥ ९

राम गीतावली के एक पद्य का कुलुई अनुवाद

५

माई कशलया बेटे निहालदी, मनदी शगन केरदी भाठा ।
 बोल डै काउडै सच जै कबै, एजणा बचडै तू जै बाठा । १
 दूधा न मूछिए तौभे खियानू, भौतैरै गाजीआ भौरिए हूने ।
 चूंजी बै तेरी दियानू डै मौढ़ने, औज सन्यारा न कुंदन सूने ॥
 सीता समेत जै भौरिए होखी, भालिए लानू डै कालजै शूने ।
 लखण रामा, ऐ पौढ़तू पाठा । मनदी शगन केरदी भाठा ॥ २
 बौणा न एणे रै नेड़ धियाडै, जाणीऐ हुई री माई वियाकल ।
 पंडत जोतषी शाधिऐ तिनरी, बौदिए जौवा ता पुछदी गल ।
 बोला जी शास्तर रौहू की हाँठ । मनदी शगन केरदी भान ॥ ३

तेई है बौगतै कौसकी लोकै, भरता आगै न खबर आणी
 रामै रै एणे री तुलसी शूणी, मोरदी म्हाछी बै मिलू जै पाणी
 एतै री तैयै थी काउड़ा बाठा, मनदी शगन केरदी भाठा ४

भारत वर्षे री स्तुति

६

धन धन म्हारै हिन्दु सताना
 सारी दुनिया न चमकी शाना
 मूंडा पांघे तेरै हीऊरी पघड़ी, काया नाजैरी हौरी
 नाल नौई तेरी लोहू री सीरा, चूल फूलिये भौरी
 सती बेटड़ी जोधै जुआना ॥ १ ॥ धन धन म्हारै०
 बाल बचै तेरै शौठ करोड़ा, घोर बौसदा घौणा ।
 गोरू भेड़ा हाथी घोड़े पखेरू, फौला बूटी रैं लौणा ॥
 खान्ती भोरू बे अंता खजाना ॥ २ ॥ धन धन म्हारै०
 धन धन तेरै लीडर लोका, तिन रंगा नशाणा ।
 धन तेरी चौऊ सिधै मूरत, जन गण मन गाणा ॥
 सचा सौदा ता बडी दकाना ॥ ३ ॥ धन धन म्हारै०
 एक जेहै तेरै बेटड़ी मरध, सिभ धरम जाती ।
 सारै मुख सी मितर तेरै, पंच शीलै री शांती ॥
 केरै 'बे वशै' सिभ समाना ॥ ४ ॥ धन धन म्हारै०
 जाण कार सी घोरै रै बडकै, सारै टवरी माणू ।
 गोरै चोरा बै फेटै डकाइए, राज आपणा आणू ॥
 सीभी गौमदा रचू बधाना ॥ ५ ॥ धन धन म्हारै०

नुश्रारा हिमाचल

मिश्रित कुलुई ७

देश हिमाचल न्यारा हो, जीहां भियांसरू तारा हो ।
उच्चे पर्वत हिउआं ढकीरे, सड़का ता जीहां सर्प चली रे ।

चढ़दे टूक ता कारां हो, देश हिमाचल न्यारा हो ॥ १

चीलां दियारां बभां रे जंगल, बकरी भेडां गोरू रे दंगल ।
उचियां निठियां धारां हो, देश हिमाचल न्यारा हो ॥ २

पथराली जीमी अंबर पाणी, भाग भरोसे ही जान खपाणी ।

लगदां पाणी कियारां हो, देश हिमाचल न्यारा हो ॥ ३

बाग फलां रे चार किनारे, गीत रणकदे घासणी धारे ।

जातरां नी भरमारां हो, देश हिमाचल न्यारा हो ॥ ४

देवियां देवते ढोल नगारे, पूजा ता भगती पुछ पधाड़े ।

नाटियां नोखा नजारा हो, देश हिमाचल न्यारा हो ॥ ५

डुवड़े नालू खड़ा सुकियां, कई बर्साती वधियां ।

हीळं पाणी री फुआरा हो, देश हिमाचल न्यारा हो ॥ ६

लोक भले पर वीर लड़ाके, डाकू संगते ना चोर उचक्के ।

भोलियां बांकी नुहारां हो, देश हिमाचल न्यारा हो ॥ ७

दुर्गा भवानी सँसारा री अम्मी, म्हाचलारे घरा आई जम्मी ।

वैरियां रा निपटारा हो, देश हिमाचल न्यारा हो ॥ ८

बांका हिमाचल नोखा नजारा, दिखणा बसणा सुन्दर प्यारा ।

संगतरेयां रीयां फाड़ां हो, देश हिमाचल न्यारा हो ॥ ९

गान्धी

८

जौमदै आऐ आसरै देशा बड़े न बड़े माणू, ।
देउ तुयार ता ऋषि महातमे सर्ग पयाड़ा आणू ॥१॥

की सँसार ता कढा प्रभेसर भेत थी पछियाणू, ।
कूणा सी आसै ता कीं जीबै जौ मै कौखै बै जाणा ऐ जाणू ॥२॥

तंढा है गांधी महात्मा जौमू थी, हिन्दुसताने रै भागै ।
बौरशा शौउ न पहलै, जबै भाग गरीबै रै जागै ॥३॥

पछमी भारता लाका सौराष्ट्र, पोर बंदरै री गादी ।
राज कोटै रा सिरी बजीर थी, कर्म चन्द जी गांधी ॥४॥

तेई रै घौरा न जन्म लेऊ, मौहन दासै रै नाएँ ।
धनी ता धरमी घौर थी चौखा, मनीरा नगरे गएँ ॥५॥

पौढ़िए घौरा न नौठा बलाइती, बणू वकील थी बडा ।
खटणा छौडिये चैथुए लोकै री, मजती हुआ खडा ॥६॥
एकी लोकै सौ दखणी फूकै, वकील आपणा केरू ।

देश तोखला जिकिए, गेजेरा जल्म गांधीए हेरू ॥७॥

देश बलाइती रौहै आजाद, पौढ़िए पहले जागै ।

देश होछणे पेट गजारै बै, पिछड़ै चैथणे लागै ॥८॥

आसरा भारत लंका ब्रह्मा, ता पूरवी एशिया सारा ।

अरब जीकू फरीकै मरीकै बै, चैथिए पाऊ निहारा ॥९॥

जीकुए देशै रै भूमिऐ बौसणु, कौढै गदोड़िए फेटै ।

घौरा गराहुँजी जगा जमीना, न कबजा केरिए बेठै ॥१०॥

तूबकै तोफै ता बंब रै गोलै, भूमिऐ बौसणु भूने ।

ते ता दियाउणे तीर कमाणिए, मारिए केरतै शूने ॥११॥

कुली बणाईए हिन्दुसतानी, देशा फकरी बं भेजें ।
तौखै पजेरिऐ केरी कुदशा, दगै बाजें अगरेजे ॥ १२

भारती, अरबी भूमिऐ तौखलै, होरा बी जूणा थी कालै ।
गोरै फरंगिऐ लूटी घसीटिऐ, कबजा केरिऐ छालै ॥ १३

कालै लोकैरी भाली कदशा ता सत्याग्रह पराऊ ।
बुरा नी बोलणा हौथ नी चंकणा, अड़िऐ मौंगणा न्याऊ ॥ १४

मनी नी बधकी, चोड़े, कनूना, मुख विपता खौही ।
गोरै पतारुऐ जुलम केरिऐ आखर मनणी पौई ॥ १५

शादी वियाह ता गुठै लुआणे रा, मुंडी रै पौंड बाई ।
टैक्स लैआ थी हाकम गोरै, गला ऐ चोड़ने द्याई ॥ १६

हिन्दुस्तान बी तंढा है जीकीऐ, डाहू थी कपटी गोरै ।
एई छड़ाणे री फिकर केरिऐ, आउ फरीकै न ओरै ॥ १७

गांधी ऐ तौखै न भारता एजीऐ, कांद्रेस चमकाई ।
लीडरा ढाबिऐ देशा छड़ाणे री एक विध समझाई ॥ १८

हाल थी बुरा हिन्दुस्ताने रा, आंगी थी केरी रै लोका ।
बडै लोका थी फरंगी रै वशा न होछै लोका बै जोका ॥ १९

सीभ वर्ण धर्म जाती थी, एक दूजै बै लागू ।
फयाड़दा कंढै चलाकी गरेजै री, देश नी जबै थीजागू ॥ २०

आसा बै गोरै जै बार्हका बोबू ता गल बुझुई माड़ी ।
औधा देश आपू बाइका केरिऐ ऐ गल नी फयाड़ी ॥ २१

एक बाब परभेसर बेटे सी सीभ धरम जाती ।
हरिजन बीसी तेई रै बेटै, लाऐ गांधीऐ छाती ॥ २२

तबै ढौकुऐ जादी री जगा न, शस्त्र जोर नौ गौंठी ।
सरकारा अ.गै तुबका तोफा, जात गोरी नरौंठी ॥ २३

केरु औखै बी सत्याग्रह गरेजै री गल नी मनी ।
कैद डण्डे ता फांसी ता गोली खायै बी गलै रै धनी ॥ २४

बुरी दशा थी ग्रेजै रै राजा न आसै भालीरा तदी ।
देश भगतै विपत्ती घालीआ, तबै पाई आजादी ॥ २५

राज पाट तेई नई थी लोड़ी, राम राजा थी परांदा ।
घोर घोर मै शांति पियारै रै, पांठ रौह पढांदा ॥ २६

एकी ध्याई परमेसरा ध्यां देया, गांधी म्हात्मा बापू ।
गोली मारी एकी आपणे देशीऐ, विष खाउ जंढा आपू ॥ २७

गांधा नियाऊ औउखै बौगतै, कौम धाउडै छटैरै ।
राम राज थी देशा न आणना, तेई पिछली घेरै ॥ २८

दुनिया देश रा मारगा केरु डै, ऋषि माहातमा छालू ।
सती तपी ता माणू नकौला थी, प्याशा सौ फुकरै शालू ॥ २९

सारा संसार सा गांधी रा ऋणि, मता थी तेई रा स्याणा ।
मारना काटना कोई नी कौसी, जुगती जीणा जियाणा ॥ ३०

धाउडै कौमा बै छौड़िए जुणी बै, नौठा माणू 'बेबशा' ।
पूरै केरने सीभीऐ, छौड़णे छूँच छेड ता नशा ॥ ३१

गान्धी जी रै ग्यारा वरत

६

अहिंसा, सत्य, अस्तेय, ब्रह्मचर्य, असंग्रहः ।
शरीर श्रम, अस्वाद, सर्वत्र भय वर्जनं, ॥
सर्व धर्म समानत्व, स्वदेशी, स्पर्श भावना ।
विनम्र व्रत निष्ठा से एकादश सेव्य हैं ॥

१ अहिंसा अहिंसा-कोई नी जीऊ दखेरने, काटगे ढीसणे खाणे ।
बूरा नी कौसी रा सोठणा केरणा, जाणिए चाहो नजाणे ॥ १

२ सत्य सच, प्रमेसर सचा न बडा नी तीरथ वरत दान ।
जुणिए सचै रा पकडू पाला, तेयै पराऊ भगवान ॥ २

- ३ अस्तेय चोरी नी बोलणी एतरी केलही, जै चीजा लोकै री चोरी ।
गजारै न बधकी चीज री तृष्णा, मना न आई लोड़ी ॥३
- ४ ब्रह्मचर्य ब्रह्म चरज सचा परमैसरा, धर्मा पराणे री कला ।
बेटड़ी मरधै खोटा नी केरना, मनै बुहारै ना गला ॥४
- ५ असंग्रह जोड़ना बाटणा गरजी मुजब, माल नी ढाबणा बोह ।
लालचा लोभा न भलै ता बुरै रा, ध्यान नी लोड़ी थी खोऊ ॥५
- ६ शरीर श्रम सीभी बै लोड़ी थी पौरसु चूड़दैं, केरिऐ पौजणू खेऊ ।
ऐका नी लोड़ी थी छुकीदैं पीटदैं, एका नी डेहरै देऊ ॥६
- ७ अस्वाद स्वादै रा बादै रा अंत बी कोई बी, चटका स्वादै रा बुरा ।
स्वादै रै मजै बै छौड़णै बांभी, कदी नी पौड़दा पूरा ॥७
- ८ सर्वत्र भय वर्जन, डौर सा शतरू माण्डूं रै मनै रा, भसकैलाऽसा भूकू ।
लोका सकारै री डौर नी मन जै, सच री धीरै बै भूकू ॥८
- ९ सर्व धर्म समानता, धरम सिभ परमैसरा आगै, पुजणे आली सी बौता ।
आपणी बौतीऐ हौंइदे रौहणा, होरा बै टोकदैं मता ॥९
- १० स्वदेशी घौरा गराएं रा लाकै रा देशै रा, सट समान लगाणा ।
कौतणा, बुणना, कुटणा, पीशणा, देशै रा देशा न खाणा ॥१०
- ११ स्पर्श भावना, उथडै निशटै भीतरू बार्हकै, छुंघु न छुंघणु सारै ।
बाव प्रमैसर एक सा सीभी रा, अपू न सिभ भरारै ॥११

गीता री 'स्थित प्रज्ञ' माण्डू री पद्धियाण

१०

अर्जण जी ऐ पूछू

स्थित प्रज्ञ समाधी न बेठा दा कुण, बोलणा कृष्ण जी ।
कंढा हौंइदा वेशदा उठदा, कंढी तहैं सौ हूसदा की ? ॥

भगवाने दसू

लोभ चाउ ता मनै री भाभा, बुण अरजणा ! छौड़ा सर जदी ।
आपणे आपू न मंस्त जबै जै, स्थित प्रज्ञ बोलीणा नदी ॥२

सुखा न जुण नी फुलदा नां ता, हादीदा पौड़िऐ जूनी ।
भीक भुरी ता डौर नी जौस बै, धीर वृधि सौ मुनि ॥३

गौमदी गला बै खुशी नी जुण ता, माड़ी नी गला बै रोंदा ।
भल्ले ता बुरे न जुण नी लेसीदा, धीर बुधिया सौ होंदा ॥४॥

मुंडी ता दूंडी बै कछुआ जंदे जै, आपू हेठै सा भाड़ा ।
भोगा न इंदरी भाड़ला तंदे जै, स्थित प्रज्ञ सौ फियाड़ा ॥५॥

छूटी जाऽसी भोगणे बांभी ऐ, भोग बी काया रै सारै ।
लाग बी तीनरी जाऽसा तबै, ऐसा आत्मा रै बृहारे ॥६॥

चबै बालहुई इंदरी जतन जाण कारी, बी चाहे केरा ।
जोरा जबरिऐ माण्हू रै मना लै, आपू धीरै सी घेरा ॥७॥

जोर केरिऐ ईना बै गोठै ता, मेरी सरना न पौऐ ।
ईना इंदरी बै जीतणू आला, स्थित प्रज्ञ होऐ ॥८॥

विषै भोगा बै सोठदै सोठदै, मन तीसै सा टीका ।
तबै पै जागा सी मनै री भाभा, भाभा चूटीऐ भीका ॥९॥

भीकै जौसा सी भरम मना न, माण्हू बेउरा तबै ।
बुध मारिया सा बेउरै फिरिऐ, सौ मूर्ख ता डूबै ॥१०॥

ईना इंदरी भोगदी घेरै, बुधी ओपरी डारै ।
मन सौजजीरी विरती लाइऐ, प्रसाद आत्मा पाऐ ॥११॥

हुआ प्रसाद जबै अर्जणा, तबै दुख निभदै जाणे ।
खुशी माण्हू री अकल रौहा सा, सदाहै एकी ठकाणे ॥१२॥

नीमा धरमा बांभी न अकल, भावना तबै नी भली ।
भावना घटी नी मना नी शांति, शांति शांभी नी तसल्ली ॥१३॥

ईना इंदरी भोगा न मनै, जुण इंदरी छेड़ी ।
सौ तीणा सा अकली तदे, जंदे जै बागर पाणी न बेड़ी ॥१४॥

तूई री तैयें पै महाबाहू जी, जुण मनो काबू न आणे ।
आप आपणे भोगा न इंदरी, तेई री बुध ठकाणे ॥१५॥

सीभी जीवै री रात सा जबै, जागदे तबै सी जोगी ।
 तीना मुनि री रात सा जबै जै, जागदै हौ आसी भोगी ॥१६॥
 चौऊ धीरै न भौरीदा नौइऐ, ताइम सागर भाला ।
 सुखी सौ भोग डूबदै भूणी न, सुखी नी भोगणू आला ॥१७॥
 सीभी भाभा बै छौगिए जुण जै, माणू न गरजा रौहैं ।
 माया ममता ह ऊंता छौडिऐ, शांति प्राप्ता सा सौहैं ॥१८॥
 'ब्राह्मी स्थिति' जबै मिलू परमेश्वर, मोह नी तेता रौह ।
 ऐसा न पेशिए मौरदी धेरै, ब्रह्म रै मजै न पौऊ ॥१९॥

गुरु नानक जी री वाणी 'जपु जी साहब' रै शब्दै रा कुलुई चुआडा

११

असल सत सा सीभी न बडा नां, सी तेई रा एक उँकार ।
 प्रगटा आपू ता सौउतै वीसदा, तेयै बणाउ ऐ सारा सँसार ॥
 तेई री काया ना बौगत बेला, तेई नी कौसी री डौर वकार ।
 किरपा तेई री बधकी शदर' सौहै सा सीभी न बडौ सकारि ॥१॥
 सोठीऐ सत नी मिलदा कौसी बँ, सौठदै बेशा जै लखा है वारी ।
 गुडक बेधिए तबै वी तंडा है, लाईऐ बेशा जै केतरी ताडी ॥
 भुख पकारिए रौजीदा नई, ज बौन्हिए भौरिए बुजकै भारी ।
 सैधै नी चौलदी बुध मियाणे री, ढाबुई बेठै जै लख हजारी ॥
 कंठे परांडदा सत परमेश्वर, चोडीदी भूठै री कैइ दी घाली ।
 नानक बोला सा मरजी तेई री, लिबुई चौलणी संवण म्हारी ॥२॥

हुकम तेई रा दूणीदा नई जै, हुकमै वणा सी घाट नुहारा ।
 हुकमा लयै पै वणा सी बडे, ता हुकमे लुका सी जीउ सँसार ॥
 हुकमै हौआ सी भलै ता माइँ वी, औउखी सौउखी हुकमा सारा ।
 एका बै हुकमै मिला सा गादी, हुकमे होरा सी फिरा नकारा ॥
 हुकमा भितरं विदरा सारी सा, हुकमा बाभी नी कोई वुहारा ।
 तेई रा हुकम जबै फियाड़दै, कीई नी केरदा हाँऊ हँकारा ॥३॥

केरला कुण सराहुती तेईरी दसीदा नई जै जाणे नशाण ।
 केरनी कौस सराहुती तेईरी, कठण जोसरं विदया ज्ञान ॥
 माण्हें बणांदा ता केरदा छार बी, एकी रै होरा न भोरदा प्राण ।
 बूभी दा दूर सा मना न नेड़, जै केरै सराहुती कौसरें वाण ॥
 लख करोड़ है दूणदै रौहात गल नी निभदी तेईरी जाण ।
 देण नी निभदा मोंगदै थकदै, केतरै जुगा न खांदे सी खाण ॥

धरम पंथ सी तेई रै हुकमैं, नानक कोई नी बोथ ठकाणा ॥ ४

सच्चा सौ मालक बी नां बी सचा, सची सी तेईरी मुकती गला ।
 देंदा है रौहा सा मोंगदी दुनियां, दै दै बोलिऐ केरदै हला ॥
 कीजीरी तेई बँ दे आम डाली, तेई रै घौरा बँ भालदै भला ।
 भूरदा आसा बै अरज गुणिए, कौखै न केराम दूणन कला ॥
 तड़कै उठिए सोठणा मालक, अरजा केरनी ताड़ना पाला ।
 पिछलै करमै मिलीरी काया ता तेइरी दया न मुकती पाला ॥

नानक बोला सा बुझणी तेइरी चौउ चकुंठा न सचै री कला ॥ ५

सोठिए मिलू बणायै नी बणू आपसे आप सा सौ न थौहा ।
 पूजू सौ जूणिए तीनै पराऊ, नानक मालका पूजदै रौहा ॥
 दूणदै गुणदै सोठदै तेइवै काटीऐ दुखा सा सुख परौआ ।
 नाद ता वेद सी गुरु रै मुखा न, गुरु रै मुखा न सिभ सी होआ ॥
 गुरु परमेसर पारबती गोरख ब्रह्मा बँ जाणदै रौहा ।
 तेई ता गुरु बँ हाऊं सा जाणा, दसनू कंठै जै दूणना पौआ ॥

मूँबै सा दसूदा गुरुऐ सीभीरा जीबै रा दाता सा सोठदै रौहा ॥ ६

तीरथा न्हाणे रा तबै सा मजा जै पुजदै तेई परमेसरा आगै ।
 तेई नी गौमै ता चीधिऐ कीजी बै काया बै पाणी न चोकदै लगै ॥
 जेतरी दुनियां भाली ता कोई बी करमा घटी नीपुजै न भागै ।
 चमकै अकल हीरै जुआ हरा साही जै गुरु रै मंतरै लागै ॥

गुरुऐ दसु जै सारै संसारै रा एक सा दाता नी बिसरु भागै ॥ ७

राजे रघुवीर सिंघा शांगरी आलै रा मोरन

राजै साहवा शांगरी आलैआ, तेरी गीता की लाणी ।

रघुवीर सिंघ राजै री कथा, होई चौली पराणी ॥१॥

मान सिंघै री जीतुई ठाकरी, शांगरी नशाणी ।

मान शान डाहै काइम कुलूरै, खान दानी परणी ॥२॥

कंडी शोभली सूरत मूरत, बांकी नीत ता बाणी ।

सचा लीडर कौल ना कपट, सची गला जनाणी ॥३॥

बुध न्याऊ नसाफै री, बृकम बीता आणी तै आणी ।

सोठी शूणीऐ तेरै चलितरा, हौखी बगदा पाणी ॥४॥

नई छोडी रगनाजी री चाकरी, कुल रीत नभाणी ।

केरी दशमी औधी न, धाउडी नौठा एक वधाणी ॥५॥

कीब हुआ बे वीगत मोरना, नोली गल ऐ जाणी ।

बीज पौई जंडी एकी चमाकै न, फीरी दुनिया काणी ॥६॥

नीभू खौल्हड़ खरच राजेआ, नीभू तौयड़ पाणी ।

अढ़ा गोभुआ एकी पटाकै, न नइ छोडी नशाणी ॥७॥

रोंदी विदरा हुई बेबश ता हुई वेढे री राणी ।

दादी हिडमा रै फाड़ै न, नौशिऐ सूता पोचा वधाणी ॥८॥

गसाई तुलसी दास जी-राम चरित मानस

रा एक टुकड़ु अयोध्या कांड राज तिलकै री तियारी कुलुई बोली न

१२

छंद दंडक

फाड़ै पांधै जौसरै हिमाचनै री बेटी उमा, मूंडा पांधै देवतै री नौई माई गंगा सा ।

मौथै पांधै चंद्रमा ता गौला न सा विष होर, हीका पांधै जौसरै ता खड़पा भजंगा सा ।

जुण महा देऊ सारी दुनिया रा मालक सा, सदा सौहै जुणिऐ भभूता लाई अंगा सा ।

सौहै शर्व शिव जुण सौउते बराजीरा सा, रक्षा करै आसरी सौ शंकर नशंगा सा ॥१॥

लागी राजगादी फूल खुशिए नी जुण ,
जबै हुआ बनबास तबै दुखै नई भाडुआ ।
कमलै रा फुल रघुनंदने री मुख शोभा ,
भला केरे केरै लोड़ी औउखा नवाडुआ ।

नीलोफर फूला साही शाउँलै नरम अंग ,
बांवी धीरै जौसरै बराजीरी सी सीता जी ।
ढौकीरै सी हौथा लायै तीर ता कमाण बांकै ,
मौथा टेकू तूसा आगै रघुकुल पिताजी ॥२॥

जदी नौरै राम जी वियाह केरी घौरा आऐ ,
रोज नौवी मौजा ता वधावे लागै बाजदै ।
पुना परतापै रै बादल सुख बरसादैं ,
चौदा लोक परबत रूपा न बराजदै ।

ऋधि सिधी धन माल नौई साही उलड़िऐ ,
ढावी दी अजुध्या रै समुद्रा मौँभै भगदै ।
शुचै बड़मूलै हीरै मोती साही बांकै सिभ ,
बेटड़ी मरध जाती भांती रै सी सजदै ॥३॥

नगरै री शोभा किछ दूणने री गल नई ,
बुझिया थी ब्रह्म आगै एतरा है जोर सा ।
सीभी गलै सुखिया सा जुधया री प्रजा ,
सौ राम जी रै चंद्र मुखा भालदी चकोर सा ।

सुखी सिभ माई होर सैधणी सहेली जबै भाली ,
लूड़ फौल दैदी मन रै मनोरथा ।
राम जी रा रूप रीत नीत ता सभाउ भालै ,
नौचा राजै दशरथ जी रा मन मोर सा ॥४॥

दोहा :- सभै मना न चाहँदै, सुखदै देउ महेश ।
दैदे आपू रामा बै, गादी म्हारै नरेश ॥५॥

बोलू राजै शूणा ऋषि मुनी रै प्रधान होरो, हुआ अबै राम सीभी गलै जाणकार सा ।
 वजीर कर्मचारी सिभ अवधै रै वासी जुण, वैरी सा कि मित्र चाहे कोई एक सार सा ।
 मूंहै साही हेरा सीभी लोका बै सा प्यारा राम, बौरै लायै तुसरै ऐ लैइरा तुआर सा ।
 मोह सिभ एई सैधै केरा सी तूसा है साही, बाह्याण सी जे नाम तीनरा परआर सा ॥ ९
 जीने गुरु चरणे रा माटा लाऊ मौथै सैधै, तीनै केरु काबू सारा सुख डाहा बुझिऐ ।
 आसा साही एतैरा तजरबा नी कौसी बै जै, मिलु संवस माटा चरणे रा पूजिऐ ।
 एक भाभ रौही अबै मेरे मना महाराज, तुसरी है दया सैधै ऐबी जाणी पुगीऐ ।
 हुऐ मुनिराजी भालू सचा प्यार राजे रा ता, बोलू केरा हुकम नी डाहणी गल गुझिऐ ॥ १०

दोहा :—

नां जश सभ किछ देणिया, तुसा रा सा माःराज ।

इच्छा न आगै फौल सा, तेरा नृप सरताज ॥ ११

हुये सीभी तैह परसिन्न गुरु, जाणू जबै, केरी मीठी मीठी गला सैधै राजै अरजा ।
 केरा महाराज तुसै हुकम ता देई देदा, राम चंदरा बै जुबराजा आला दरजा ।
 होंदा आसा आसतै ऐ उच्छव ता जलसाबी, हौखीरा सुआद लैई लैदी सारी परजा ।
 दया तुसरी ऐ शिवजी ऐ सिभ पूरी केरी, पूरीदी ऐ भाभ ता नभेरी देदा फरजा ॥ १२
 फीरी नी थी भौख काया रौहंदी की जांदी लागै, रौहंदा नी कौसी गलै पीछे पछताईणी ।
 खुशी हुऐ मुनि शूणी गल दशरथ जी री, मौउज वधाई खुशी मजै री लभाउणी ।
 शूण राजा जौसरै वरोधी पछताईया सी, जौसरै भजना बाभी जौलनी नी जाइणी ।
 सौहै परमेसर सा बेटा बगू तेरा औज, रामा बै पबितर परेम मन भाइणी ॥ १३

दोहा :—

राजा छेकै देर नी, केरिऐ कुल समान ।

रामै री गादी जबै, सौहै बेल प्रमाण ॥ १४

खुशी होइऐ राजा नौठा तबै बेढै भीतरै, मलाजम सुमंतर वजीर शदाइऐ ।
 केरी तीनै दुं बलिऐ जै जिया महाराज, राजै मूल गल दसी तीना बै शणाइऐ ।
 लागी मेरी गल सीभी पंचा बै ज शोभली ता, देआ राज टीका रामचंदरा बै लाइऐ ।
 शूणी गल राजै री वजीर होरा हुऐ खुशी, हौरा फीरू बूटा जंढै ठीक पाणी पाइऐ ॥ १५

केरी तबै अरज वजीरै हौथ जोड़ देया, मीनै सरकारा बै करोड़ा साला जीउणा ।
भली सोठी महाराजै मुलखैरै भली आली, छेकं केरी देया नई बोहू बलगीउणा ।
बधी खुशी राजै री वजीरै री जै गल शूणी, जंड़ी लूड़ बधासा चढ़ायै बड़ै भीउणा ॥ १६

दोहा :- राजै बोलु वसिष्ठ मुनि, जै किछ हुकम शणाए ।

रामै री मादी तै ये, केरा कुल उपाए ॥ १७

बोले महाकृषिऐ ऐ खुशी होयै मीठीं गला, पाणी सीभी तीरथै रा ढावा एक आणिए ।
ओखती बनासती जलाड़े पौचा-फूल-फौल, होर बोबहू सारी चीजा दसी तीनै गौणिए ॥
मृग छाला चौउरी अनेक भान्ति कपड़े री, रेशमी नुआलै कई रंगे रै सजाणिए ।
हीरै मोती रतन ता होरा चीजां सैकड़ो ते राज गदी आगै लोड़ी आणी पछियाणिए ॥ १८
जंढा-जंढा वेदा न वधान सा सौ दसू बोला, ताणी देया नगरा न रंगो रंगी चानणी ।
फौला सुध अंबैरै सपारी रै बी बूटै आणा, गड्डा शहरा फेर सैधै गोल्ही-गौल्ही साजणी ।
चौक पूरा हीरै मोती मणियां रै बांकै-बांकै, साजणे बजार तीसैं बंदन माला बौन्हणी ।
केरा सीभी भांतिऐ बराह्मणे री सेवा होर पूजा गणपति कुल देउ देवी मनणी ॥ १९

दोहा :- तोरण कलश धजा सजा, हाथी घोड़ै रौथ ।

मनिए मुनि रा हुकम सिभ, लागै हौथो हौथ ॥ २०

जंढा कौसी माण्हू बै हुकम मुनि होरै केरू, तेयै शटाशट शेटू कौम सौ नभेरिए ।
जौस गलै राम जी रा होऐ कल्याण भला, राजै देऊ साधु ता बराह्मणा रजेरिए ।
शूणी जबै लौकै राज गदी री खबर तबै बुधियान घोर-घोर बाजै लागै बाजदें ।
लाग सीता राम जी री काया न शगन होंदें, मिधै लागै फड़कदै भलियाई साजदें ॥ २१
खुशिए ता भूरदेया आपू मौकै दूणुऐ ते, भरतै रं ऐजणे री बुझिया नशाणी सा ।
हुऐ बोहू रोज अबै लाग़ा बुरा तेई घटी, तेई मिलणे री ईना शगना शणाणी सा ।
नई कोई दुनिया न भरता न प्यारा आथी, तेहै लागै शगन ऐ शास्तरै री बाणी सा ।
राम जीबै भरतै री याद एंदी रात घ्याड़, कछुऐ रें मना जंढी डाने री कहाणी सा ॥ २२

दोहा :- रौणक बधी नरौलै री, शूणिए खबरा बांकी ।

सागर छाली उछलदी, भालिए चंदर भांकी ॥ २३

बेढ़े जायै जणिए शणाई गल पैहले है, कपड़ै ता गहणे रा नाम मारु लेइऐ ।
 खुशी होयै तने मनै फुली सिभबेटड़ी सजांदी लागी मंगलौ रँ कौलशौवै लेइऐ ।
 राणीऐ सुमितराऐ / बोहू मणिरतने रँ, बांकै - बांकै पूरै बोहू ऐपण बणाइऐ ।
 राम जी री आमै बड़ी खुशी होयै दान धीने, बोहू सारै ब्राह्मणा बै बेढ़े न शधाइऐ ॥ २४

पूजी देवी ग्रांरीता होर देउ नाग पूजै, बोलू फीरी देनू हांऊ होर भाग बलिरा ।
 जौस गलै होए कल्याणग श्री राम जी रा, देआ दया केरी वरदान गला भली रा ।
 गांदी ते वधावे लागी कोकला रँ कंठा आली, मुख चंद्रमां रा ता नैन मृग छेली रा ॥ २५

दोहा :- तिलका आली गल गुणी, मर्ध बेटड़ी राजि ।
 भाग चमकदै जाणिए, खूब सजावट साजि ॥ २६

तबै द्याऐ शाधणे वशिष्ठ मुनि राजै होरै, भेजै राम जी रँ बेढ़े बुध समझाणे बै ।
 शूण गुरु होरा आऐ एजिए परौली आगं, टेकू मौथा राम चंद्र वशिष्ठ जी स्याणे बै ।
 सौळा है समग्रीऐ पूजिए ता अर्ध दे यै, आणे बडे माना सँघे हांधरै वशाणे बै ।
 बीदी जौ घा दूही दूहए सीता सुध जौड़ै दूहै हौथ तीने हुकम फरमाणे बै ॥ २७
 बोलू आए मालक जै चाकरै रँ ओवरै न ऊंघ भलियाईरा कशगने रँ नाशा बै ।
 पर महाराज गल सुलुटी ता अंढी ती जै, कौम थी ता आपू आधौ बाधी लंदै आसा बै ।
 छोड़ी बड़ियाई केरी भूरी दया आसा पांधौ, केरिए पवित्र औज आसरै निवासा बै ।
 केरीदेआ हुकम जै होला कौम आसाजोगा, मिली जालाचाकरीरा पुन मूंनै दासा बै ॥ २८

दोहा :- आदरै री गला गुणी, तिने सराहै राम ।
 त्रिबै नू अंढा दूणदा, सूर्ज कुलौरी जाम ॥ २९

राम जी रँ गुण ता सभाओ बै सराहिदेआ, बोलें भूरदेआ गुण राम अंढी गल सा ।
 सोहू महाराज होरै तौनै देणी राज गदी, केरु इंतजाम पोरै सजीगैऊ जलसा ।

केरी लई औजा न बंधेज ब्रह्मचारी आला, विधि होऐ शास्त्ररै री एता न कुशल सा ।
 अंढी गल दसिऐ ता मुनि नौठा राजे आधै, सुन्ना रोही गुणदेआ रामे री अकल सा ॥ ३०
 जौमै आसै एकी जगा संध जबै सिभ भाई, खांदै, सौंदै सौंधै एक साथ न खलाऊऐ ।
 हुऐ थी जडोलण जनेऊ जबै एक साथ, सौंधै चार भाई आसै कठ थी वियाहुऐ ।
 अंढै नामी कुला न ऐ गल गोई बड़ी माड़ी, बड़ा भाई राजा होछै भाऊ वछड़ाऊऐ ।
 भगतां रै मनै रा वकार हुआ दूर जबै, भाऊआं री भूरी लायै राम पछताऊऐ ॥ ३१

दोहा लछमण ता बै पोहुता, मनदा खुशी अनंद ।

आदर मानै दुर्गिऐ, पुजै थी राम चंद ॥ ३२

बाजै लागै जोधया न भांतो भांत बाजदै ता, मौज मजा नगरा न सौंऊते मनाइदा ।
 लोका थी निहालदै जै पूजी जांदा भरत बी, हौखी रा सुआद कोई तेई रै बी पाईदा ।
 हाटी ता बाजार सौंधै गौल्ही-गौल्ही घौर-घौर, वेटड़ी ता मरधा न चरचा शणाइदा ।
 काल कबै जेहै होला लगन सौ तिलकै रा, होणी जबै राजगदी कौम मन चांहीदा ॥ ३३
 बेसी जांदै सीता सुध सुनै रै संधासणा न, होई जांदी मनै री मरादा अंढी सोठदै ।
 लोका थी निहालदै जै कबै जेहै काल होंदी, देवतै थी सोठदै जै कंदै गादी ठाकदै ।
 देवतै नी गौमी अंढो जोधआ री धूम-धाम, चोरा बै नी प्यारै जंदै जोथ प्यारै लागदै ।
 बार-बार जौवा वौंदी देवतेआं देवी री जै, देवतै रा कल्याण केर माई शारदै ॥ ३४

विपता आसरी भालिऐ, केर जतन तू औज ।

राम चन्द्रा वनवास दै, केर आसरी मौज ॥ ३५

देवतै री गल बणी दुखी हुई सरसुती कमलै, रै बीणा जंडा पौंड हीउ पाला सा ।
 भाल पछतांदी देवी केरी भीरी अरज जै, माता तौबै रती नई दोष एणू आला सा ।
 राम जी बै खुशी ता वसोपत किछ लागदा नी, तू ता माता खरी तहै तीना जाणा भाला सा ।
 जा तू माता बुधिया बै आसा देवतै री तौयें, जीउ सभ करमे रा दुख सुख भाला सा ॥ ३६
 रोहा ता सी सरगा न कौम केरा निशठे सी, होरी री भलाई कदी देवतेआं साधी नी ।
 होणहार आगली रा केरु जै बचार तेसै, बुरा कौम मनणा ऐ कदी कौसी कवि नी ।
 तबै नीठी पुशीऐ सौ दशरथ नगरी न जंदै, ग्रहदशा कोई करड़ी सा पाई धिनी ॥ ३७

मूरख बेटड़ी मंथरा, कँकेई री नकराणि ।

अकल मारिए तेसरी, बदनामी बै आणि ॥ ३८

भालू जबै मंथरे नगर भकमकदा ता, चौऊ पासो बाजा गाजा बाजदा बधाई रा ।
 पूछे तेसैं लोका अंढी कीजी री सा धूम धाम, शूणू राज तिलक ता होल पोऊ दाही रा ।
 सोहू तेसो मूरख कजातणिए "कंढी तहैं रातो रात बिगड़दा कोम ऐ बणाई रा" ।
 जंढे कोई जंगली री बेटड़ी 'मखीरा आलै छतै तयें जतन बचारदी सफाई रा ॥ ३९
 होयै बड़ें दुखी तबै नोठी कँकेयो आगै, होसदेआ पूछी कीबै मंथरा तुआस सा ।
 इस्तरी चलितरै रै होखू रोही शेटदी जबाब नीछी देई लागा लोमा लोमा स्वास सा ।
 'धीनीं होली लछमणे अकल ऐ बूझिया सा; बोलू राणी होसिए तू केरा वकवास सा ।
 नीछी हूणी तबै बी सो दासी रौड पापण ता खड़पणी साही लाऊ छोडणा सुआस सा ॥ ४०

दोहा:- बोलू राणिए डोरदै, तू हूणदी किवै नीं ।

महाराज ता राम बी, राजी खुशी ता सी ॥ ४१

लछमण, भरत ता शुघन, सिभि री खबर शणा ।

अंढा शूणू मंथरै, लागी कालजै दा: ॥ ४२

कीबै कोई आसा बै पढाला माई अकल ता, आसरा सा कौसरा जे वकवास केरना ।
 मौउजी न कुण रामचंदरा न पोरे ओज राजे लाउ जुण ओज गादी न बशेरना ।
 भाग हुए शोभले कशल्या रं बड़े जूणी कठण घमांड हुआ कालजै पड़ेरना ।
 भाली धूम धाम हुई दाह बड़ी मेरे मना, अंढा ठाठ बाठ तूसा आपू जाये हेरना ॥ ४३
 बेटा परदेशा न नी भौख रती नेरे मना, बूझा सी जे महाराज काबू मेरे आई रै ।
 बलंग तलाई पांघे नीज मीठी एंदी तुसां, भाली दा नी खोट राजा जी री चतराई रै ।
 शूणी मीठी गला मन कपटण जाणिए ता फिड़किए बोलू चुपमोर फाफा कुटणी ।
 दूजी घेरै हूणली जे अंढा घोर फोड़नीऐ तेरी लोमी जिभ भूं सा खरी तई बूणनी ॥ ४४

दोहा:- लाटे काणे कूबड़ें, कपटि मोझरी जाणि ।

बेटड़ी सो बी सेउका, बोलिए मुसकी राणी ॥ ४५

धीनी में सजाह तौबै हायें भल बोलनीए, सुपने बी तो पांघे भीक मूबै आई नी ।
 जदी तेरी गल होली पूरी सी है बन भाग, तेई ध्याइ साही कोई घड़ी सुखदाई नी ।

बडा भाई मालक ता हछे भाई सेवादार, आस रवि कुलै री ऐ नीत बसराई नी ।
 सच जाणी कालहोला रामाबै जे राजटीका, भाली तौबै धीनी मुहामौंगी मै वधाई नी ॥ ४६
 सिभ आसै सी कशल्या साही एक सार, एक जेही आसै राम चंदरा पियारी सी ।
 मू पांघै रामै रा पियार किछ बधका सा, परखी मै कई घेरे भूरी है नुआरी सी ।
 मू बै ता जैदेला ब्रह्मा आगला जनम तबै राम चंदरा लोड़ी बेटा न्हूश सीता प्यारी सी ।
 प्राण न बी बधका पियारा मू बै राम चंदर, राजा होला तेरे मना कीबै लागी आरी सी ॥ ४७

दोहा : भरते रै सो: बोलू तू, कपट छौडिऐ वैर ।

खुशी न ता दुख केरदी, कारण प्रगटा केर ॥ ४८

एकी घेरे हूणिए है पाई लैई पूरी मै ता, दुजी घेरें हूणनू ता जिभ शेटी लूणिए ।
 भौनणे है जुगता कपाल सा नभागा मेरा, दुख हुआ तूसा भल आली गल शूणिए ।
 हाऊं लागी कडुई ता ने लागै मीठै तूसा, केरा सी जै मीठी भूठी गला गौंठी हूणिए ।
 आगो बै के राम अबै आसै बी खशामदी है, नी ता रात ध्याड़ चुप बेशी रौहै कूणिए ॥ ४९
 केरी परमेसरै करुण हुई वेबश, धीना सौहै मिलणा जै बाहू सौहै लूणना ।
 कोई बणे राजा होणा आसा बै की बाधा घाटा रौ:णा नकराणी आसा राणी नई वणना ।
 आसरा सभाऊ गोऊ बड़ै वूदें फूकणे बै, बुरा होए तूसरा सौ जाईदा नी भलणा ।
 तेसौ गलै लाई थी मै गल बौगते री, हुई मेरी बडी भूल राणी पौउ माफी मौंगणा ॥ ५०

दोहा : मीठी कपटी गला शूणी, बेटड़ी बुधणि राणि ।

देवै री मायै मोहुई, लाई सौ पतियाणि ॥ ५१

घड़ी घड़ी आदरा न लागी राणी पूछदी सा जंदै गीता गायै मोहा भीलणी सा हिरनी ।
 सोठू जंडा मंथरै थी दाऊ तंडा लौगा गैऊ, जंडी होणहार होणी तंडी बुध फिरनी ।
 तूसै पूछा सी ता मू बै हूणदेआ डोर लागी घोर फोड मेरा नां फीरी तूसै धरनी ।
 खरी तहें परखु वशाह तवें जोधेआरी, लाई सादसती ऐ कपट गला भौरनी ॥ ५२
 बोलू तूसै राम सीता तूसा बै पियारै जंदै, राम बै बी तूसा सँघे तेबड़ा पियार सा ।
 चलै नौठे अनै ध्याड़ें तंडी जवै गल होंदी, प्यारै बी बणा सी बैरी बौगते री मार सा ।
 पाला सा सूरज जूण कमलै री फसला बै, रुड़ी मौंभै सौहै केरी देंदा तेई छार सा ।
 सौहुकण तूसारा जलाड़ा चाह पेचणा सा, तेई बै बचाणे तैयें लाणा फेर वाड़ सा ॥ ५३

दोहा:- सुहाग भरोसै फिक्र नी, कावू न बुझिए राऽ ।

मन कपटी मीठी गला, तुसरा भोला सभाऽ ॥ ५४

चतर चलाक बडी रामचंदरै री आमा, कौम तेसै कौढी लैउ दाऊजेहा लाइए ।
भेजी धीना भरत ता राजे माउलै री धीरै, हुआ सभ कौम ऐ कशल्या री सलाहिए ।
होरा सिभ सौहुकणी शोभली सी मूं सेंधै, अकड़ा सा राजे पीछे भरते री माई ऐ ।
जौलनी सा तुसरी कशल्या बै माई होरो, प्रगट नी केरदी कपट चतराइए ॥ ५५
तुसा पांधे राजे रा पियार बडा भलीदानी, सौकणी रा होंदा आऊ अंढा है सभाउ सा ।
केरु तेसै घोला मोला राजा कावू केरु, रामचंदरै रै तिलका बै लगन गणाऊ सा ।
गदी राम चंदरा बै गल खान दानी, ठीक लागी साभी लोका बै ता मूं बी बडा चाऊ सा ।
डौर लागी मूं बै आगै एंदी गला सोठदेआ, लोडी भगवान केरे फौल तेसै पाऊ सा ॥ ५६

दोहा:- करोड़ा मेंभर गौंठिए, ताणु कपटी रा जाल ।

शौउ कथ शौकणि री दसी, होए भीक बुआल ॥ ५७

होण हार अंढी थी ता धीजा आउ राणी बै बी, पुछी सौ सगंधी शौऊ देयै तबै राणीऐ ।
हाजी बी नी पयाड़ी अबै पुछणा की रौहु तुसा, घाटा बाधा पशु बी सी जाणा पछियाणिए ।
हुआ औधा म्हीना ईना सज धज केरदेआ, तुसा लागी पता औज सौवी मूं न जाणिए ।
खांदी लांदी लागीरी सा तुसारै है राजा मौंके, सची गला दसणे न दोष की सा राणिए ॥ ५८
गौंठी गांठी हूणनू जै भूठी गला तुसा सेंधै, देला भगवान मूं बै डौंडेसा गलै रा ।
होई जाला रामा बै जै काल राज तिलक ता, विपता रा बेजा तौबै बाह्या नी भलै रा ।
बणी जाणा तंढी तुसा जढी म्हीखा दुधै री सी रेख देयै हूणा सा ऐ बोल मेरै बलैरा ।
बेटै सुध केरली तू नौकरी जै इनरी ता, रौही एई घौग सा पुआऊ तेरै भलै रा ॥ ५९

बिनता दखेरी कद्रुऐ, तुसा कशल्या दखा लि ।

लछमण संधी केरिए, भरता कैंदी पालि ॥ ६०

गला शूणी करडी ता कैकेई डौरी गई, नोली किछ हूणी सीधी शूकी डौरै लाईए ।
देही पौऐ पौरसू ता कौभी केले पौचा साही, डाही डौरै तेसै जिभ दौंदान दवाइए ।
क्रोड़ा कथा कपटै री तेसै शणियाई जौस गलै सब्र केरै राणी मन समझाइए ।
भाग आऐ खोटै लागी कपटण प्यारी नीछी रौजी हंसणी रै धोखे वगली सराहिए ॥ ६१

मथरातू जुग तेरी सिन गला सची लांगी, मेरी सीधी हौखी रोज रोहासा फड़कदी ।
 रातो रोज होआा सी धियाड़ बुरे सुपने ता तो सँधौ दूणी नाली
 केरनू की माँदिए सभाऊ गोउ सीधा मेरा, दँहणी ता बांवीं गला मूँबे नी रड़कदी ।

आपून सार नी ओज तइ, बुरा कौसिरा केरु ।

कुणि लायै मूँबै भला, दुःख एतरा पेरु ॥ ६३

रौही जानू पेउके उंबर भर बण्ही जायै, केरदी नी जीदँ जीवँ सौहकणी री चाकरी ।
 बैरी रँ धीन जीणा जीस देऐ भगवान, मौरना सा भला तेई जीणे न ता मथरी ।
 अंढी गला धीनगी री दूणी बोहू राणिए ता इस्तरी चलितर चलांदी लागी कुबड़ी ।
 अंढा कंढा बोलासी केरिए मन धाउड़ा जी दिन दूणा बधै तेरा सुख ता सुहागरी । ६४
 जुणिए जै (सोठी) होजी बरयाई तुसरी ता मिलू लोड़ी ते ही बै सा फौल एई पापैरा ।
 जरी नोरें (मै) कर ऐ (गुगु) बभियाणिए मैं, ती ज सुख नौठी नाधिआन रौहू आपैरा ।
 पुछै भुगी लोक तीनै रेख पायै बोलू सच, मिली जाणा भरता बै अवधैरा राज सा ।
 सेवा लायै तुसरीए वशान सी महाराज, केरनी ता दसी देनू ऐतैराजै लाज सा ॥ ६५

लाडै बेटै छोड़नू, खूहै देनू छाल ।

मेरी तोयें बोलदी, किबै नु केरनू भाल ॥ ६६

केरी मगजूर कैरेई कुबड़िए तबै काटै री मन पाथरा न पलोइए ।
 एंढी बिषा रागी रँ री भाजुई थीं तंढै जंढे ठगीदा बौलीरा पशु हौरें घाहा हेरिए ।
 गुगी गज मीठी पर अंता पांधै खोरी जुग मादुरा थी धोलू ऊँजै म्हाँ खरतड़ाइए ।
 तबै बोनू आद होली तुमाबैकी न होली, डाहीरीसा एक गल तुसै राणियाइए ॥ ६७

दुई वरदान राजै आगँसी अमानत जे मौंगी लैली तीनां ओज छाती केरी ठंढी तू ।
 भरला बै राज बनवास रामचंदरा बै मौंगिए ता सौकणीरी चोड़ चांढा अंढीतू ।
 राजा जबै केरला संगंध रामचंदरै री तबै मौंगी नई ता नी लोड़ी राजा बदलै ।
 छुटी रात ओजकी ता होई जाणा बड़ा द्रोह, तुसै मन लायै मेरी ईना गला मनलै ॥ ६८

पापणिए दा - लाइए बोलु कोप घोर जा ।

कोम सम्हालिये केरैई, भेंट पट मत मनी जा ॥ ६६

जानी न पियारी बुझी राणिए सौ कुबड़ीता, बार-बार लागी तेसा अकली सराहंदी ।
तौ साही आपणा नी दुनिया न कोई मेरा बाल धीना मूं बै लागी पाणीन थी बौहंदी ॥
एई ठबें काल मेरे होली पूरी मनैरी ता तौ बै भाऊ साहीईना होखी मौंभै डाहंदी ।
बोहू तहें कुबड़ी बै आदरता मान देयौ, केकई नौठी कोप भवना न रोहंदी ॥ ७०

जीमी बणी केकई ता तेसरी कबुद्धि वरसात वणी मंथरा बेजा विपतारा बाहुआ ।
कपटै रा पाणी पौऊ जौमु बेजा सरभर, दुई बौर पौच लागै फौल दुख आउआ ॥
केरिए समान कोप भवना न जाई सुती केरदी थी राज सौ कुमतिऐ गुआउआ ।
नगरा ता बेढें मौंभै धूम-धाम बड़ी भारी, एई घोलै मोलै रानी थोघ कोइ लाउआ ॥ ७१

नर नारी सारै खुशी, सजदै मंगल चार ।

तुरदै कोई निकलदे, बड़ी भीड़ दरबार ॥ ७२

यार बचपणे रै ते खुशी खुशी मनै सिभ पौंज पौंज दस दस रामा आग एजदै ।
राम जी रा प्रेम पछियाणिए सराहिआ सी, मीठी मीठी गला सैघै हाल चाल पुछदै ॥
राम जी री केरदै सराहुति ते आपू मौंभै, पूछी पाछी राम जी बै घौरा धीरै फिरदै ।
कुण रघुबीरा साही होला एसादुनिया न नीउते सभाउए पियारा बै नभेरेदै ! ७३

करमै रै फौलै आसै जौस जौस जूनी जालै एक गल भगवान आसा बै दियादै ।
असै लोड़ी सेउक ता सियापति मालकए, इना मतै फीरी तौयें आसाबै नभाई दै ॥
अढी मन इछया थी नगरा न सभीरी ता केकई राणी होरा मनोमन दाही दै ।
नीच मतै सैघै नई अकल ठकाणे रौंदी पौड़िए कसंगती न कुणनी मटाई दै ॥ ७४

७५ ॥ १५

राजा खुशिए सौंभकै, केकई आगे आए ।

देह धारिए भूरि बुझ, भीका आगे जाए ॥ ७५

शूणू कोप भवने रा नां राजा ठिठकुआ, आगै नीछी गौई पौड़ी मना मौकै डौरीऐ ।
 बला लायै जौसरै सा इंदर न डौरा रौहा, जीया होर राजै सी जौसरा रेवा हेरिऐ ।
 सौहै राजा शुकी गंड बेटड़ी री भीका शूणी, भाला करामात बड़्याई कामदेव री ऐ
 मारै कामदेव ते है फुला अल बाणे जुण, मारीदै नी बज्र शूल खड़ग तलवारीऐ ॥ ७६
 डौरदेआ तबै राजा नौठा प्यारी राणी आगै, भालू हाल चाल दुख हुआ बडाभारी थी ।
 धौरनी थी लेटी री ता कपड़े पराणे लायै भांतो - भांते भांडे डहै अंगारै तुआरी थी ।
 कंठा एसै मूरखै कशगगे रा कौम केरू, रौंडीणेरी धीनी जढ आणी होणहारी थी ।
 कौस गले रुशी रौही दस मेरी प्राण जानी, नेड़ जायै ठूणी राजै गल सीठी प्यारी थी ॥ ७७

छंद :- कारणे कुणिए भिकुऐ राणी जी, छुंघदै लागै ता हौथ डकाऊ ।
 बुभणा भिकुई नागणी कालीऐ, भिक घरौछिए हेरना लाऊ ।
 भाभा थी दूई ते बणी थी जीभा, दौद ते बौर निहालदै दाऊ ।
 तुलसी होणी रै चकरै राजा कामै रा चकमा लेखे न पाऊ ॥ ७८

दोहा :- बांकी हौखणी कंठणी, घड़ि-घड़ि बोलै राऽ ।
 कोपैरा गज गामनी, कारण मूं बै शणाऽ ॥ ७९

बोल प्यारी कुणी जणे केरू तेरा बुरा दुई मुंड कौसरै ता जम कौस चाहा नेणा सा ।
 बोल कौस मंगतै बणाई देनू राजा औज बोल कौस राजें बै नकाला औज देणा सा ।
 तेरै बैरी देवते बी मारी हाऊं सकदा मकोड़े साही, लोक छूंड छाउणा नगौणा सा ।
 हांड तेरै मुखा चंद्रामांए रा चकोर सा सभावा एई मेरे तूता सही तहँ जाणा सा ॥ ८०
 मेरे ता पराण परुआर बेटे सरबस, परजा समेत तेरै वशासी पियारिए ।
 केरा सा सगंध हाऊं रालचंद्र बेटे री जैं केरिऐ कपट तौबै ठूणा होला आहिए ।
 हौसिए तू मौंग मूं न मन चाही गला केर बांकी कायापांधै गहणे कपड़े शंगारिए ।
 वीगत कवोगत फियाड़िए वचार केर, शेट अब कोपा आल कपड़ें तुआरिए ॥ ८१

दोहा:—

शुणि सगंध खुशिए उठी, गहणे लांदि गुआर ।

हिरना भालिए हेड़नी, केरदी फाहि तियार ॥ ८२

फीरी बोलू राजै तेसा भली माणू जाणदेआ मीठी मीठी गला बाता दूणिए पियारै री
केरी धीनी मनैरी मराद तेरी माँदिए मै, घौर-घौर घूम भाल नगरै री सारै री ।
सजी दै तू बांकीऐ शंगार अबै शुभाआलै केरी देणी राजगदी रामजी री दोतोऐ ।
शूणदेआ विदकीं नरौठी राणी केकई जंढै विदका सी पीके बाल तोडा कोतीऐ ॥ ८३

अंढी बडी दाह तेसै हौसिए गभेई जंढै चोरै री जनानी कोई प्रगटी नीरों दी सा ।
राजैनी कियाड़ी चतराई कपटणि जुण कोड़ कपटी रै गुरू री पड़ाई होदी सा ।
राजनीति चतर थी राजा चाहो छूटा पर बेटड़ी चलितर समुदरा न गहरा ।
नकली पियार दरशायै तबै बोलू तेसै हौसदै मरोकदेआ हौखी होर चेहरा ॥ ८४

दोहा:—

मौंग मौंग ता बोलदे, देण लैण नी बास ।

दुई वर देणे केरिरै, मिलणे री नी आश ॥ ८५

कियाड़ी जेही राजै तबै हौसदेआ बोलू तौबै सीभी न पियारी लागा मान ता बड़ाई सा ।
डाहीरी अमानत नी माँगी कि बै औजा तये भलक्कड़ सभाउ मै बी आद वसराई सा ।
भूऽ मूठ दोष मत देआ तुसै आसा बै ता चार माँगी लैआ तुसै दूई री की लाई सा ।
प्रण चले जान पर वचन नी जाणे दें दै म्हारे रघुकुलै री ऐ रीत चली आई सा ॥ ८६
बोहू सारै पाप बी नी एकी भूठा जे तरै, नी रतियां करोड़ा लायै परबत बणादा ।
सीभी पुताधरमे रा मूल सचियाई, सभ वेद ता पुराण मनु महाराज मनदा ।
तेता पांघे रामे री सगंध रौही खाउ इऐ, मेरे पुता प्यारै री सा राम हृद आखिरी ।
केरो गल पक्की बोलू हौसदै कबुघणिए, बाजै री कमति रै जै खोल्ही टोपी हौखी री ॥ ८७

रामचंद्र जी रै जनम लेणे रा एक कारण—१३

राजो प्रताप भानू री कथा, रामायणे रै बालकांड न रामायणे (तुलसी दास जी री)
रै दोहे ता मै कुल्लू री बोली न दोहै है बणाइऐ लिखे पर चपाई रा बेउरा कुलुई चपाई

लिखै पर चपाई रा बेउरा कुलुई चपाई न नीआ औपड़ी, तब मैं बोहू जैहैया ३१ आखरे
 साँद के छंद छौहूँ, उई न तुलसी दास जी रँ एकी एकी शब्दै रा पूरा-पूरा मतलब कुलुई
 बोली न भौरू दासा, एतैरा पता रामायणा सँघे मलान केरिए लांगी सका सा। सँघे
 कवितान तोल ता गिणती काईम डाहणे री तैयें शब्द आगै पिछे केरने पौड़ा सी दोहै दाहै
 न ता मात्रा री गिणती तैयें कोहरै शब्द दोहरै ता दोहरै रँ कोहरै केरने पौड़ा सी तब
 पौढ़ने ता फ्याड़ने न जरा कष्टी होआ सा, छंदा कविता रा काईदा होआ सा जै तिनरा
 तोल भाख एजी जाऐ तब पै पूरा मजा एजा सा। अंढा है स्हाब पिछली कविता रा बूझणा
 ऐ दूहै प्रसंग धाउई सी तूई री तैयें हाऊ माफी चाहा सा।

बाल कांड १५२ दोहे न आगै (रमायण गीता प्रेस)

गुणा मुनि कथा सा पराणी ता पवितर जै, पारबती आगै शिव शंकरै शणाई थी।
 प्रसिद्ध सारी दुनिया न दश एक कैकय सत्यकेतु राजे तौखै राजगदी पाई थी।
 बड़ा जाणकार धरमात्मा थी राजा परताप तेज न्याउ ता नसाफ बडियाई थी।
 दूई बेटे हुए तेई राजे रँ थी जाणकार, होनहार जोधे वीर बडे दूहै भाई थी ॥ १

जेठा बेटा जुण राज पाणू आला टिकका जै थी तेईरा थीनां "परताप भानु" डाहीरा।
 कोन्हा "अरिमरदन" काँउर थी जुण सौ बी, डटणिया जुआन नथोघा जोरी बांही रा।
 कोई छल कपट वरोध तीना आथी नी ती, आपू न पियार भूरी बड़ा दूही भाई रा।
 धीना राज राजे "परताप भानु" टिके नैता आपू बीणा धुणा तप केरने वौ लाईरा ॥ २

दीहा :- प्रताप भानु राजा बणू, देशा फिरी दुहाई।

धरमै परजा पालदा, शेटू पाष मकाई ॥ ३

तंडा है वजीर 'धर्मरुचि' जंडा गुकर थी राजे री भलाई आला चतर सजान थी।
 आपू परतापी सँघे जोधा रण धीर थी ता मंतरी सियाणा थी ता भाई बलवान थी।
 चतुरंग फौउजा नगोणी आपू आगै थी ता भादर लड़ाके वीर फौउजी जुआन थी।
 भाली जबै फौउजा ता राजा परसन्न हुआ खुशी रँ दमामे दाजै उडदै नशाण थी ॥ ४

जीतणे री तैयें थी बणाई फौज - फाण तब हेरिए घियाड़ा चढ़ डंका बजाईए।
 जगा-जगा बीता न लड़ाई हुई बोहू सारी बोहू सारे राजे जीते जबर लड़ाईए।

सोत द्वीप जीतें जोर बबरिऐ काबू केरें, छोड़ें केरें जीतिऐ ते डंड भरमाईऐ ।
एक थी प्रताप भानु चमकीरा तेई समे सारी दुनिया न जश आपणा फलाईऐ । ५

दोहा :— जोरें दुनिया जीतिऐ, नगरा केरु प्रवेश ।
फौल आई है वगैरें, पांदा रोहु नरेश ॥ ३

परतापा लायै परताप भानु राजें रैं, ऐ कामधेनु साही हुई पृथ्वी सुहाउणी ।
कोई दुख रोहु नई बरजा न सुख बिसू, धर्मीं हुऐ मर्ध सती बेटडी सुहाउणी ।
भक्त भगवाने रा बजीर धर्म रुचि चुणी राजैरें भलैबै नितनौवी नीत आणनी ।
गुरु देउ ब्राह्मण ना संत होर पितरैरी केरा रोज राजा भी सभी री मन भाउणी ॥ ७
शास्तरान जे नाम धर्म लिखे राजेश्वरैं तीना सीभी माना सैवै केरिऐ सुख मना थी ।
रोज रोज केरा थी सो दान भांति भांति रैं ता वेद ता पुराणा रोज गुणा थी ता गुणा थी ।
बोहू सारें बाडडी तलाई खूहै जगा जगा फूलैरें बगीचैं बाग बांकै रोज बणा थी ।
ब्राह्मणे रैं घोर देऊ मंदर थी बांकै बांकौ तीरथ बांचतर बणाए कई गुणा थी ॥ ८

दोहा :— जो पुराण वेदे दसै केरें ते सभ जाग ।
भार भार बारी सभै, केरें ते बे लाग ॥ ९

फौलेरी नी भाभ कोई राजैरें थी मना मौंभैं अंठा राजा बुद्धिमान चतर सजान थी ।
धरम करम मन बाणी सैंधै केरें प्रभु अरपण अंठा हुआ राजा ज्ञान वान थी ।
एकी घेरें बांकै जेहै घोड़ें पांघैं चढ़िऐ सो, हेड़ें, खेल्हीणो रा सारा सजिए समान थी ।
विध्याचल परवता नौठां घोणे बीणा मौंभैं बोहू सारें मिरगैरी कौडी शेटी जान थी ॥ १०
भालू राजें सूर एक फिरदा थी बीणा जंठा राहू ग्रह सोभुआ चंदर माबै ग्रसिए ।
बडा गोउ चंदर सो नीछा खाखी ओपड़ीऐ नोलू भीकै गुली रोहू होऐ गोला फसिए ।
अंठा सो डराउणा थी सूर भारी कायाता डराउणी नुहार लागी डोर दौंदा देखिए ।
छेड़ गूणी घोड़े तबें लाग़ा घुर घुरदा हेरान होय भालदा सो कोना खंडे चकिए ॥ ११

दोहा :— नीलें जोतैं री चूल जां भालू मोटा सूर ।
राजें रैं रोकुआ नई, घोड़े मारी ठूर ॥ १२

जबै छेड़ गूणी सूरें घोड़ें री जैनेड़ एंदी मारी तेयो ठोर जंढी बागरी री चालिए
भट पट राजी बी चढ़ाऊ तीर धनबा न बेशी गेऊ थीरनी सो सूर तीर भालिए

ताक लायें मारें केरें बाण राजें केतरें वचाए केरी जान सूरें चाल बाज छलिए ।
 गोभीदा ता प्रगदीदा रोहू सूर भगदा सौ भीकें लायें रोहू राजा पीछें पीछें चौलिये ॥ १३
 बडी दूर निकता सौ सूर घौणे जंगलान जौखें हाथी घोड़ें नी थी कदी तूरी सकदै ।
 केल्हा रोहू राजा बौणा जूनीविथा बडी भारी तबैं बी नी राजा बौत राजा हेड़ें थी छौडदा
 सूरें जबैं भालू राजा जिगरें हिआउ आला, तूरु डूधी जुधली द ठोरें ठोर भगदा ।
 जबैं हेरु राजें आगें बथणे बै बौत नई, भूली गेउ बौत पछताइए थी हटदा ॥ १४

दोहा :— थकिये भुखुआ शोखुआ, राजा घोड़ें सुध ।
 नौई सौरा तोपदा, पाणी बाकि वसुधा ॥ १५

भटकदै भालू एक आशरम बौणा मौंभै रोहूदा थी राजा एक ऋषि आलै भेषा न ।
 जौ सरा थी देश परताप भाने जीतू होंदा छौडीए लड़ाई फौज भगीरा थी देशा न ।
 चमकदै भाग परताप भानुरें फियाड़ें आपणे ता डुबदै फियाड़ें चौउ दिशा न ।
 नौ ऽ नी ती घौरा बै सौ हारु होंदा राजा लौजें हेरुआ रियासती रें कौसी बी मनुषान ॥ १६
 भीक जीकी मना मौंभ डेठी बणू रोहू बौणा कुटिया बणाइए तपस्सी साही बणिये ।
 तेई आगें नौठा राजा तेयौ पछियाणी लैऊ कपटी तपस्सी राजौ बोलू पछियाणिये ।
 भूखें शौखें राजें तबें नोली पछियाण केरी जटा जूटा आलै तेई ऋषि मुनि जाणिये ।
 ओथा घोड़ें पांघें न ता टेकी धीना मौथा सेंघें केरिये चलाकी नांद स्सू नई जाणिये ॥ १७

दोहा :— राजा शोखा जाणिये धीना सौर रिहाई ।
 पाणी पीऊ घोड़ें सुध दुहिये शांति पाई ॥ १८

उतरी थकाउट ता राम बुभु राजें तबैं कुटिया बै आपणी सौ साधु लैई गौऊ थी ।
 ओउडू थियाड़ा भालू रोहणे बै बोलू मीठी मीठी गलै डेंडिये सौ राजा मोही लैऊ थी ।
 कुण सी जी तुसै कीबै भटकदै बौणा केल्है बांकी सी जुआ न कीध जानी पांघै खेलदै ।
 लछण सी तुसारें ता जंडें चक्रवर्ती आलै भाबदेआ मना न वचार लागै एज दै ॥ १९
 राजा सा प्रताप भानु शुणात महातमा जी बडा है प्रतापी हांऊं तेईरा वजीर सा ।
 खेल्हीदा थी हेडा पर बौत मैं बिसरि पाई तुसरें चरणा पुजु मेरी तकौबर सा ।
 दरशणा तुसरें नियमत सौ आसा बै ता होणहार भली होणी कोई गंभीर सा ।
 तबैं बोलू साधुए निहारुआ बोगत अबै सतर योजन तेरा घौर दर वीर सा ॥ २०

दोहा :— रात निहारी घौर बणा रहना नी महाराज ।
 जाइत रात विहाइए, राती रोहा औज ॥ २१

दोहा :— रात निहारी घोर बण, रस्ता नी महाराज ।
जाइत रात विहाइए, राती रोहा ओज ॥ २१
होणी जंढी हौआ सा, तंढा मिलदा मेल ।
आपु नि कौछे एजदा, तेई नेंदा नेड़ ॥ २२

साधु जी र हुकमा बै मनिए प्रताप भानु राजा बेशी गैऊ घौड़ै बूट सव बौन्हीए ।
तबै केरी साधु री सराहुती बी बडी भारी आपणै बी भागै री चरण बौंदी-बौंदीए ।
सौधै हूणी मीठी गला मी नीए जभानीए जै केरी मैं शरेड़ा माई बापू तुसा मनिए ।
मूं बै महाराज बुझा बेटा सौधै चाकर बी नां जाः दस्सीदेआ आपणी जभानिए ॥ २३
राजै पछियाणू नी ता तेयै पछियाणी लैऊ, भोला भाला साधु चतर चलाक थी ।
एक ता थी बैरी दूजा छत्री सौबी राजा तेई कौहणा थी कौम छल कपटै ऐ ताक थी ।
सोही-सोठी राज सुख रोहा थी सौ जौलदा आवै साही धुखै केरी छाती न कड़ाक थी ।
सीधी गला जबै शूणी तेयै राजै री ता अंढा वणू छौड़ जंढा बैर खतरनाक थी ॥ २४

दोहा :— कपट भौरि मीठी गला, केरी तेयै अजीव ।
नां मेरा डैठी अबै, घौरा बाझि गरीब ॥ २५

बोलू राजै तुसा साही जानै रै मठार पर गरब घमंड डहै जुणिए नभेरिए ।
सीभी तहै चतर ता जाणकार होदेआ बी माड़ै भेषै रोहीरै सी आपू बै गभेरिए ।
तंढे ते नमूलै लोका हरि बै पियारै हौंदै बोलू सत लोकै अंढा वेदा बै बचारिए ।
तुसा साही माँगता गरीब ता न घौरा जुण, हौआ सा भरम शिव ब्रह्मो बै बौ भल्लिए ॥ २६
तुसै जुण कोई होलै मोथा टेकू चरणा न केरी देआ दया तुसै मूं पांधै मालका ।
सीभी तहै राजै बै चजेरिए ता भूरदेआ बोलू राजा ओखै हाऊ बौसू बोहू सालका ॥ २७

दोहा :— हाजी नी मिलू कोई, ना मैं आपू शणाई ।
मशहूरी बौणा साही, तया बै देदी जलाई ॥ २८
भेषा न चतर नि भुलदं, ठगिया सी अणजाण ।
बांकी बोलि नुहारिए, सव मोरै रा खाण ॥ २९

एसे गलै रोहा सा संसारा मींभै गुपता ता भगवाना पोरै नई मतलब कोईरा ।
जाणै सोहै सिभ किछ दसे बाझी, बोला तबै लोका पतियाणे रा की मतलब पौईरा ।

तूसौ चौखै चतरसी मेरे बड़े प्यारै वसुआस ता पियार तूसां मूं पाधै होईरा ।
अबै राजा हांऊ तूसा कौढी देनू फेटै तबै बडा भारी पाप दोष होणा मूं बौ तौई रा ३० ॥
जीऊं जीऊं डेठीऐ दुआसी आली गला केरी तीऊं तीऊं राजै बै बगहाह लागा वधदा ।
जबै भालू काबू हुआ मनै कौमै गलै बातें लागा ठग मी ी गलै राजै होरा ठगदा ।
नां मेरा 'एक तन' गुणा तूमी महाराज, राजा बडी धीनगीऐ लागा तबै पुछदा ३१ ॥

— जदी बणू संसार थी, तदी जौमु थी हाऊं ।

दूजी घेरै जौमु नी, तबै एक तनु नाऊ ३२ ॥

मत होऐ शुन बेटा एसै गलै मना मौंभै बडा सारी चीजा मौंभै दुनिया न तप सा ।
तपो बला सैंधै ब्रह्मा रचदा संसारा बै ता तपो बला सैंधै केरा विशनु सारकशा ।
केरा तपो बला सैंधै शिवजी सा नाश अंढा बडा है वचित्र तपो बला मौंभै जश सा ।
खरी गौमी राजे बै ऐ गला जुणा तेयै हूणी आपणी पराणी जै शणाई तेयै कथ सा ३३ ॥
कर -मेरी, घर -मेरी, कथा वरशोहा साही केरी बोहू गला तेयै घरम गियानेरी ।
कथां लाई बडी मीठी लूण ता मसालै लायै दुनिया बै रचणे ता धाचणे मकाणेरी ।
ईना गला गुणदेआ हुआ राजा वशान ता केरी तेयै गल नां आपणा दर्शणेरी ।
बोलू तबै साधुऐ जै जाणा हाऊं साहै तौबै लागी गल खरी मूं बै नां गभियाणेरी ३४ ॥

दोहा: — गुणा नीति राजा तुसै, सौउतै नीं लैंदे नां ।

मूं बै तेरी भूरि सा, चतराई मनी तां ३५ ॥

राजा तेरा नां सा प्रताप भानु पता मूं बै सत्यकेतु नां तेरै बापू जी रा पता सा ।
गुरु जी री किरपान पता सीभी गलैरा सा चींधिऐ नी दसू तबै आपणा ऐ मता सा ।
भाली लैई राजा आसै तेरी सीधयाई होर प्रीत परतीत होर नीति निपुणता सा ।
अबै तूसै पूछ ता शणानू कथ आपणी बै आसरै मनान आई तुसरी ममता सा ३६ ॥
हुआ परसन्न मेरे मनानी भरम रौहू भाभा जुणा मनान सी नेआ राजा मौंगिए ।
गुणी बांकी गला तबै हुआ राजा खुशी केरी बोहू भाँति अरज साधुरी जौंधा बौंदीऐ ।
चार है पदारथ सी आए मेरें हौथा पांधी दयारै समुद्र तेरे दरशन करिए ।
बभिया जी तबै बी प्रसन्न हुऐ भालऐता मौंगी लेनू बौर खुशी मालका बै हेरिए ३७ ॥

दोहा: — बुढ़िणा मौरता दाहिणा, जुधा नि लोड़ीहार ।

कल्प शौऊ आधीन हो, विणिह बैरी संसार ३८ ॥

(तबै साधुऐ बोलू)

जा राजा थीना बौर 'अंडा हीई जाला' पर एक गल करड़ी सा तेसा डाही शूणिए
बाम्हणै री जातीन सुआऐ सारी दुनिया बौ बोल देनू पाई तेरे चरणा न आणिए ।
तप बल तीना आगे तबै बडा बाह्यण सा कोष होऐ तेईरा बचाणा तबै कूणिए ।
जबै ईना बाम्हणा बौ केरी लौलै काबू तुरी विशनु बरह्य शिव वशा न सी एणिए ३६ ॥

चौलदा नौ बाह्यणे री जाती सेंघै जीर बल सच कूणी देनू हांऊ दूही बांही चैकीऐ ।
लागला नू बाह्यणे रा तुसा बौ शराप जै ता, होणा नई नाश तेरा डाहू आसौ ठाकीऐ ।
खुशी हुआ राजा जबै गला म्हातमे री शूणी पूछू महाराज मेरा नाश कदी होणा सा ।
तेरी किरपा न अबै बाबा महाराज मूं बौ आगे बौ बी तुसा है कल्याण है कमौणा सा ४० ॥

जवाहर जोत - १४

दोहा :— नोखा माणू थो जवाहर लाल, एई जुगै रा देड ।
सभी देशो रा कौकड़ी कालजा चट थोसिए नैऊ ॥

कंढा शोभला भीतरै बाहरै खाख हौसणु आली ।

भौर बौग तौ आइ डै कौऐ न तौबै मौरन ताली १ ॥
लागी कौसरो नजरा तौवै कौस खाखी री गाली ।

बौणा रुणे तौबै गोरु गुआलै रुणे छैता न हाली २ ॥
जीदै जीबै तौ देशा छड़ाणे बौ बडी विपता घाली ।

जाती तौशिया छार बी आपणी सारै देशा न राली ३ ॥
तौ लायै थी नेहू चाचा सारै देशा न दाली ।

बौत भालने बौ सारै संसारा बौ डाही जोत तैं बाली ४ ॥
वे बश, हुई इंदरा बिंदरा चूटी ठौकणू डाली ।

सती हुई डै तेरे बजोगा न तेरी प्यारी मनाली ५ ॥

जुगनु जीजु-१५

जुगनु जीजु पराचदै होरा
मारदे कुणा निहारखी राती न ओरै न पौरै बौ ठोरा ।

ठूँट कीजी औ भाऊं भियाऊं कंठा ऐ ओरा ता पोरा १ ॥
 सरगा पांघे सी बादल ताणुऐ चौउ कनारै डपट्ट ।
 घोरनी आपणा आप नी भालीदा कौऐ न भालीणे होरा २ ॥
 निहारा पौईरा दबका अंठा बाहँ नी कोई बी एंदा ।
 खडी कियाड़िऐ हौंढा थी जुणा ते गोभुई बेसी रें घोरा ३ ॥
 कंठ मसौलिये गाश बियाने न एक बरीबर प्याशा ।
 विजली लसकी गोभुऐ धिख ता गूडू न जतनी डोरा ४ ॥
 उडें बियाने की सरगा तारै ऐ तौपदें होलै ठकाणे ।
 बांगला दे शैरे लोकौ रा जंठा जै आसरै दे शान जोरा ५ ॥
 अंठा सा बुझिया गौहरी लोकै री आई जणितर बाल्ह ।
 होमा बै ओंथी कीं नाउरी अंबका भौखें मसौलै शनोरा ६ ॥
 लागी नृमु डें री होली की चाली आए ऐ गढिये होलें ।
 चुलकै टैंडें की विजडी भेड़ा भालिये बाघा की चोरा ७ ॥
 हाँऊ निहारै न इंदर धनख तेई परांदे की होली ।
 सीभी रै हौथा न शौली पियाशा, सीभीए मारदं ठोरा ८ ॥

फौजी वीर—१६

राजी रौहा भारतै रै जोघेओ जुआनो औज,
 गल सा जभाने पां घें तुसरी जमाने री ।
 सा बाशा यारो तुसँ आन डाही भारतै री,
 नाश केरु वैरीरा ता ल्हाशा बेईमाने री ।
 सोरै भाई साही हुई एक जान जबै सीभी,
 पारसी ईसाई सिख हिन्दू मुसरमाणे री ।
 शीऊं केरी शेट पेची नीऊ नाम फेटै जुणा,
 आए सीवा सैटै जबै वौरी हिन्दुस्ताने री १ ॥
 भारती जुआने थी समुंदारा न सेउ लाऊ,
 कथा नल नील जाम बंत हनुमाने री ।

चन्द्रगुप्त पोरस अशोक विक्रमेरी गला,
 केरी ताजी अजि पृथी राजै री चुहाने री ।
 बडै बडै जोधौ वीरै देशा पीछै जानी धीनी,
 शिवाजी प्रताप हुए बाल हिंदुआने री ।
 देश री आजादी पीछै गोली खाई लागै फाही,
 घाली लोकै कैइदी सा कथा बलिदाने री २ ॥

चार गेरै हमलौ कराए ईनै बैरी लोकै,
 कसर नी डाही तोफा तुबका समाने री ।
 चेका चोड़ू चीने रा मरीकै रा मरोकू नाक,
 लका लकी बेठी जुरदाने री ईराने री ।
 मारै सेवर मिराज नैटा सैधै तूसै तंढे जंढे,
 चीड़ू पांघौ बाज हुई जंग आसमाने री ।
 सरगा समुदरा न जोता न ता बंदरा न,
 बैइरी जुआन भूने भासी खीला धाने री ३ ॥
 धन धन जीउ ता हियाउ यारो जोधौ वीरो,
 जींदै जीनै जान केरी जौउ रै नजरा ने री ।
 शाण्डुएं जरींवा पांघौ फरकदै हीवां पांघौ,
 मुख री सीवां बांधौ डौर नी बगाने री ।

जोता गौहरै रा शोला पाला गाश पाणी हौड़ नाला,
 घामे रा दुआला चाहो लू रेगिस्ताने री ।
 सीभी जगा एक सार औठ पौहर खबरदार,
 रौह दूर पार नई खबर जमाने री ४ ॥
 शेटै पंलग रजाई ठौकै ता मोरचौ खाई,
 तूसै जानी री नी डाही भौख आपणे बगाने री ।
 भारती रै बेटै तूसै जबर कटेटै यार,
 हा:—केरी बेटै डाही शान खान दाने री ।
 बणू देश बांगला सौ छूटा ईना पछमी न,

य ह्या ता अयूब खांदे हवा जेलखाने री ।
लोहू रा जा होदा टीपू कवि रा नी हाजी खीपू,
चै, हुई तेतरै बेवश पाकिस्ताने री ५ ॥

माण्हू री जात-१६

माण्हू जै म ण्हू री अकल केरान देवा न बडी सा माण्हू री जात ।
घरमा धनैरी नसली जाती री चांडा सा चीधकी उलका पात ।

दया बी केरा न जीवा नै भूरान देवा न बडी थी माण्हू री जात
एक संसार ता देश नगौणे देशा देशान लाकै सी बोहू ।

लाकै न जिले तसीला पचास्ती आएं रा लेखा हिसाब भी रौहू ।
आं न घौर ना घौरा ता टबर टबरा प्रति सी पारटी शौऊ ।

पारटी पागटी भौटी दी खांडी सीभी रै मनान कपट पौड ।
एकी है काया रै अंग सी सारै की केरनी एकीए दूजै री घात ।

दया जै केरान जीवा नै भूरान देवान बडी थी माण्हू री जात १ ॥

कृषिऐ केर थी वरण घर ता माण्हूएं ताणे ते चाल्ही हजार ।

उथड़ै निशटे विसुऐ नापिए जाती रा पाती रा पाउ खलारा ।
लोडी थी सीभी रा धरम एक ता औज सा सीभी रा धरम न्यारा ।

मेरना बूटा न ठौकीदा कौसीरै डालू नै ठौकिए लाइ पकारा ।

एक प्रमेसर मूल सा सीभी रा प्रेम सा तेईरी धरम जात ।

माण्हूएं माण्हू री अकल केरान देवा न बडी सा माण्हू री जात २ ॥
पूरबी पछमी उत्तरी दखणी एक सांसारै री परजा सारी ।

कोल संगोल ता आरिए द्रावड़ हवशी गोरे सुमुदरा पीरा ।
मिल मजूर मजारें ता मालक घोड़ गुआर ता पिठ बगारी ।

होथ कमीणिए दस्तकारिए जीमी कशाण ता हाट बपारी ।
प्रोहत जमान वकील ता साईल मंतरी बोटर कर्मचारी ।

रंगे रा धनै रा कौमी रा फरक एता न पौरै नी गल ना बात ।

एसा जे गलां बै सिभ फियाड़ा न देवा न बडी थी माण्हू री जात ॥ ३
 जेतरी दुनिया भालुई कौसीऐ असल सार नी समझी जाणी ।
 कीड़ा ता पूजीरा कीसै रा कीसिए, दुनिया दिसदी रोही न शाणी ।
 कौसा बै तोषाम सिभ निहारै न टकरा मारदी विदरा काणी ।
 आपू सी पोकिया होरा बै पोकदै तबै बी खाया सा दुनियां स्याणी ।

बुध घुआड़दै मना बुहारदै छौडदै दूजे नै लाणी जे घात ।
 जानै री जोत जगादै दें जे मना न देवा न बडी सा माण्हू री जात ॥ ४
 फेर बगीचे न कौंड री तारा,, मौंभै सा कोरी ता बन्द दुआरा ।
 टांगुए पडदै तीरी दुआरी न चौड कनारै री बुदुई टारा ।
 सचै रा भेत पराणा सा कठण बेवश छुकुआ सिभ ससारा ।
 ज्ञाने रा कुथलु माण्हू रं मना न सौ है पराला जे केरै बचारा ।
 ठगीणा कीजीबे डंडी पखंडी न, प्रेम नी बिकदा हाटी बजारा ।
 सचै पियारै री चिलक लागली, आपु भियाणी निहारखी रात
 हांदर होखी घुआड़िए भाले ता देवा न बडी सा माण्हू री जात ॥ ५

—औउखी — सौउखी—

17

चिबिए देआ सी माण्हू बै दोष, ता चिबिए घौड़ा सा माण्हू वियाटा
 औउखी सौउखी भागं री खेला, पोजणा सौहै जे बाहू रियाटा ।
 होसदै काटे थी सौउख घ्याड़े औउखी आई ता होसदै काटा ॥

ख ऊ मखीर थी लौमिए जीभ विष बी पौउ सा चाखणा तौबै ।
 पौड़ा सा कौडें रं भोकड़ा तूरना, फूल री मौउजा लुटणी जबै ।
 फूल रा डोलर लाऊ थी नाका न जुजली लागी ता होसणा अबै ।
 एई संसारै री रीत सा अंढी जे धूषा ता छाऊं सी आपणे दबै ।

सुखै रै पौहरै केरदै मौउजा दुखै रै कुथलु भौरासी माटा ।
हौसदै काटा सी सुखै रै ध्याड़ै औउखी आई ता हौसदै काटा ॥ १

रौहला सदा जै मुस्करांदा ता करड़ी गला बी होणी सखाली ।
जीदेआ थकीरा माण्हू रा जीउडू केरला हौसला मारला छाली ।
आपूहै फिरनी पौधरी हौंडीऐ उथड़ी निशटी बीत जै भाली ।
हौसदी खाखीरै भ्याणू बै भालीऐ रात विहाणी ऐ दुखे री काली ।
हौसी री विजली केरदी प्यासा भौनीऐ दुखै रै गूडू गर्नाटा ।
दुख ता सुख सी भागै री खेला औउखी आई ता हौसदै काटा ॥ २

उडदै ध्याड़ै रै पीऊलै धूपै बै शोहीऐ नेआ सा रात का निहारा ।
हटिऐ एजा सा दोतकै बौगतै पीउली चिलक बांकी नुहारा ।
कालै निहारै रै खौटणा पीछ सौ हिशदी बौती सा तोपदी स्हारा ।
एजणा एसरा बौगत एसो है केरना प्रगटा चार कनारा ।
उडदै ध्याड़ै सा भाड़िया दुनिया रातका चूटा सा दोती सन्नाटा ।
हौसदै काटा सी सुखै रै ध्याड़ै, औउखी आई ता हौसदै काटा ॥ ३

शधीऐ एंदा नी सुख ता कालैआ धाकीऐ जांदै दुखै रै ध्याड़ै ।
खडै नी रौहंदै एकी है सौउचा निकली जाऽसी खरै ता माडै ।
खौदली निबली रौहा सी बौहंदी, माण्हू जै एतरी गल फियाड़ै ।
जीतीऐ बाल्हिऐ हारिऐ रोऐ नू, हारे नाह्याउ ना नीत बगाड़ै ।
कीजीरी छांटा सा भादरी बेबश, कीबै सा होरा बै रोयै भणाटा ।
हौसदै काटा सी सौउखी ध्याड़ै, औउखी आई ता हौसदै काटा ॥ ४

उआंसै रै कालै निहारै न कुणिए भालै डै निलहडै सरग तारै ।
कौलीरा लूवरु कबै भणादुआ घेरिऐ डाहू जै कौंडै रै भारै ।
बादलै गूडू गर्नाटा न पीहू ऐ पीहक आपणी ठाकी नी यारै ।
खार समुदरा साम्हन भालिए पीछै नी हटदै नौई रै धारै ।
हादुआ कीबै डै औउखी भालीऐ, जोर जुआनी रा पौउ की घाटा ।
हौसदै काटी थी सुखै रै ध्याड़ै औउखी आई ता हौसदै काटा ॥ ५

जोखे सी कोंडे रे भौकड़ कालैया, तोखे पै सजा सा फूल बी शोभे ।
 जोखे न भुप निहारै रा दबका जुगनु जीजू सी चमका लोभे ।
 जीणे रा मजा नी किछ बी जबै जे लागे नी पींड न दुखी रे चोभे ।
 सुखी रा मजा सा बुझिया तदीहै दुखी जे भसकं लाऐ नभो भे ।
 मुंडा गभेरदै एजणा सुखा बी दुखी री छाऊं न भालैई माता ।
 होसदै काटै थी सुखै रें ध्याडे औउखी आई ता होसदै काटा ॥ ६

सुखी रा पौहरा धीना थी जुणिए माडै धियाडै बी सौहै रिहाऐ ।
 जुणिए भौर घड़ोलू न म्हौखर कहुऐ विष बी तेइऐ डाहै ।
 बधकी गल नी दुख बी मादेआ एई संसारें री रीत है सा ऐ ।
 औउखी सौउखी राती धियाडी सी, फिरदी घिरदी एंदी सभा है ।
 मनणी औउखी देऊ रा बौर ता बुझणा दुख सा सुखी रा वाटा ।
 'बेवश' वणिए बेसी नी रौहणा चाहे हो काणा की लंगड़ा लाटा ।
 होसदै काटा थी सुखी रें ध्याडे, औउखी आई ता होसदै जाट ॥ ७

—मेरी ठौकणू डालीऐ—

तौ बाभी रौह मन रात ध्याड़ भटकदा, अबै ता सम्हाल सीभी जानी री ऐ जानीऐ ।
 छूटै पोथी पौतर ता देउ देवी संत साधु पुगती मताबक मैं सिभ हेरै छानीऐ ।
 तौ बाभी रौह मन सदा है भटकदा, अबै ता सम्हाल सीभी जानी री ऐ जानी ऐ ।
 मीठी जेही तान जुण विउंशरी न निकती ती ठिमकीऐ शौधे न गभेई डाही चिड़िए ।
 डाली जुण रौंडुई थी शौइरै री बागरीऐ, डाही सौबी बासतौ शंगारीऐ ता पीड़िए ।
 हींठा थी संजीवा जुण रोंद रोंदा दोथ होयै सौंभा बेठा वणिए सौ हाकम निहारै रा ।
 आऊ जबै जौगत नमूलां भिछया मौंगणीया बणी बेठा शाहूकार चौधरी बजारै रा ।
 एक हाऊं अंडा जुण डूबू ध्याड़ थाल्है थाल्है ठगू सरी आपणी है काया ता जुआनीऐ ।
 तौ बाभी रौह मन रात ध्याड़ भटकदा, अबै ता सम्हाल सीभी जानी री ऐ जानीऐ ॥ १

केरु जै बचार तबै उठू तौ बै तोपदा संसारें रा ता तू है बोला एक कारदार सा ।
 कुंजी सा सचाई भूरी प्यारें रा बुहार तेरी, होछा बड़ो खरा खोटा तौबै एक सार सा ।

उहू तबै भूरदा संसारै भूरु एतरा जै प्यार सरी पोले फीरै मेरी सची भूरी ऐ ।
 मानदारी मान केरु सींभी होछै बड़ै राता रौहै लौजै जानी ध्यानी ओवरी न तूरी ऐ ।
 जबै जाणकारै तेरै प्यारै रा प्रभाव जाणू, केरी मूंडी दूबली थी बड़ै बड़ै ध्यानीऐ ।
 तो बाभी रौह मन रात ध्याड़ भटकदा अबै ता सम्हाल सींभी जानी री ऐ जानी ऐ ॥ ३
 भूरी केरी दुनिया री एतरी जै पापी ता पराधी लोक सरी फिरै पाणी न बी पातलै ।
 लोक जुण जुलमा बँ केरदे पतारी दै ता माणू जुण रूख थी नरौठे ता कजातलै ।
 केरी परमेसरै बी अंठी दया आसा पांध भालू जौसा धीरै तै बी बणी गँऐ आसा साही ।
 मीटी आसै हौखी तौखै हुई रात घड़ा घड़ी, रौहा सा धियाड़ि आसै हौखी जै धुआड़ी डाही ।
 हाँऊ आसै पता जाणे अंठे घोलै मोलै मौंभे कुण जेह जतन सौ अकली बगानीऐ ।
 तो बाभी रौह मन सदा है भटकदा अबै ता सम्हाल सींभी जानी री ऐ जानी ऐ ॥ ३
 कुण जेहा भेष तौबै गौमी जाला पता नई रौहू एसै गलै हाऊं भीकड़ै बदलदा ।
 कबै जौहै एजीऐ तू हौथ मेरा ढोकी लौला एसै गलै रौहू रोज निदरा न टलदा ।
 कुण जेही तान तेरै मना मौंभे बेशी जांदी, गाऐ राग बारी बारी आसै सींभी जाती रै ।
 कोई समै रोंदेआ ता हौसदेआ कोई समै, फूल ढाबै पूजणे बी तौबै सींभी भांती रै ।
 कौस जेही खेला न तू मीली जाला खलीदा, सौ खेल कोई दसीं नोली पंडतै गियानीऐ ।
 तो बाभी रौह मन सदा है भटकदा अबै ता सम्हाल सींभी जानी री ऐ जानी ऐ ॥ ४
 रोज रोज राती हुई रोज ते भियाऐ केरी, हौखी केरी मीटै पर नीज कदी आई नी ।
 भौरु आसै डेहरु बी आपणे है मना मौंभे, पर तैं ठाकरै ता पाई कदी केरा नी ।
 पाई जाच रात ध्याड़ आसै तौभे शाधणे बी, रौहा थी निहालदै नुहार पर हेरी नी ।
 जीण रौहै जीदैं पर जिदगी न कौखै जेहै रौही कुण कसर सौ नोली पछियाणीऐ ।
 तो बाभी रौह मन सदा है भटकदा अबै ता सम्हाल सींभी जानी री ऐ जानी ऐ ॥ ५
 रौहै आसै तोपदै ता थोध किछ लागी नीछा, कौखै तौ बभिए रा असल ठकाणा सा ।
 पूछै जबै जाणकार बोलू एकी संत लोकै, हौआ सा जरूर पर करड़ा पराणा सा ।
 बोलू जोगी लोकै बोला बेश जप जोग कर, भोगी लोकै बोलू यारा भोगा न आनंद सा ।
 तबै मनी रामे बोलू मत होरी जगा तोपै, सौ ता तेरी आपणी है आतमा न बंद सा ।
 तोपू जबै आतमा ता भालू तौखै गोभुआ दा, बेठा रोंदा बेवश ता दूणू नी जभानीऐ ।
 तो बाभी रौह मन रात ध्याड़ भटकदा अबै ता सम्हाल सींभी जानी री ऐ जानी ऐ ॥ ६

मुक्त कविरी भाभ-२०

बुझा सा गीता गौंठणी अंठी जैं, पेशदी लोकैं रैं मनान झूधी ।

हिकड़ जिकदा शुणनू आला बी, जनै जे तेई री कौकड़ी छूंधी ॥

भाभ ता दाह फियाड़दी लोभी री, मने री लोड़ी थी बेदण चुंधी ।

किछ ता होली ऐ लोली बी सौंगड़ी, बोहू सा आपणी अकल छूंधी ॥

घोशा सा शौंघा ता कौमदी जौंघा, बाचदी घेरै पराचदी खूंधी ॥

आपणी कथा २१

होछी जेही बरशोह सा मेरी जौमणे नोरली कथ,

चीं चरिकड़ केरदी सीकी जंडा गनाजी रा रथ ।

जौमण-मौरण २२

कीबैं लागी तेरी भौरीदी हौखी कफण जबै ताणू ।

गौल भौरिए दुसकें कीबैं फेर चफिरदें माण्हू ।

मौरना बुरा न जौमणा बडा दूहै गला नमूली ।

एकी धीरें ता उडू धियाड़ा होरतें सीरु भियाणू ॥

सुख - दुख २३

खुशी कीबैं आसै सुखा न हुऐ, मौथा दुखा न भाडू ।

की चीज थी माण्हू रा जीणा ता कंढा आसै फियाडू ।

जीउण आसरा स्वांग तमासा आप आपणी खेला ।

एका नौचीऐ भीतरै फिरै होरें एजिए नुआडू ॥

लोभी री आद २४

होछी भौरई मनीं है नीछी आसै छूढी पतियाई ।

एक पाखली जेही दुआसी तुसै कबैं जै पजाई ।

छूढे जतन केरिए थकू तुसा वो विसरी देंदा ।

टैंहकी जोथी न दसमी शाड़ा मेलणी आद आई पें आई ॥

दाह २५

दाही रैं ना न बिदरा डोरदी दाह सीभी रो बूरी ।

आसा बेवशै रा जीणा अंठा दाही बाभी नी पूरी ।

दाह माण्हू ए रैं बाडे स पोई रो आसै दाही रे बांडे ।

चाहो होऐ सौ पोडे रो दुखैरी, चोहो मनैने रो भूरी ।

मने रो वेदण २६

फीफरी पोखणी फुकुई दीवैं न तेबड़ी भी आथी मखाला ।

जेवड़ी दाह सा जोसरै मना न तेबड़ी उथड़ी छाला ।।

तेहरवां महिना

फागणा शबातरी रो पोरलै सराजा धूम,
घोर घोर होछे बडै एसा बेनिहालदैं ।

सिभ लोक लोभो चाओ केरदैं समान सट,
घोउ तेल नाज पोथा पीशदेता चानदैं ।

रोत रात गांदैं कांसी ढोलकू बजांदैं गांदे,
नौचदैं नरेली बीड़ी सिगरिटा मारदैं ।

चाणदैं पकैव रोट के बट्टू रैं महादेव ।

पूजा भोग लायै ध्याने जागरैं रैं बालद ।
मण्डी लागी जातरा न आऐ बोहू देवी देऊ ।

अलेबै रैं तमासो आऐ बोहू लोक भालदैं ।।३

तूसा घटी जानू कंठ जौंधा लागी शोलदी ।

जेतरैं तमासो होदैं तेतरी है जोलदी ।

दौलतू छोकरे ठाकरी दुआली, हरजा देणे ने रीण कौह तेई छेकणे ने
 दौलतू जंगला न ता ठाकरी घोरा खटदे जुंडुऐ । दौलतू री चीठी
 ठाकरीऐ सूं आगे वाचणे ने आणी ता म्हीने रे म्हीने एक टपा
 जुआप बी लखाऐ केरु ।

दौलतू री चीठी, ठाकरी वै लिखू थी

राम-राम ठाकरीऐ राजी लोड़ी मेरी जोड़ी जंगला न हाऊ सीभी संधी सुघ राजी सा
 चीठी नाली लिखूई नपौह गोऊ बे वश, तूसे लाऊ बुभणा जे कि चकी नराजी सा ।
 तूमी सी गराहुंजी लखाऐ केरा म्हीने-म्हीने जोस गलै आद ता नुहार रोहा ताजी सा ।
 देश गोड पाखला ता कौमबी करारा पर बुभदा नी किछ हांऊ तंढा मार गाजी सा ।

ठारा करहु रा राजा मूंडा पांघी रगनाजी सा ॥

जेबे आद घोरे री सा हाका पाइये बोलदी तबे सई सोठदेआ छाती लागी जौलदी ॥१॥

ठाकरीऐ लखाऊ जुआप

सूही मेरे बभिया जी उंबरै रे संधिआओ आज आई चीठी हाऊं कदकी बिहालदी ।
 घोरा हांऊ राजी बाजी टाटी टोर तीती ताजी छेता खोलहा खटदी ता गोहू भेडा पालदी ।
 दाहुई की दुःखी मई नांगी शोखी भुखी नई माड़ें मनै कदी कोसी मरघा नी भालदी ।
 एक दाह कढी जेही हांवरै न निकलिए कोई समै लागी मेरे कौकड़ु वै जालदी ॥

रोहा ता सा मनीरामा ठगदी ता टालदी ॥

पर जबै सघणी वियाहूँ सोघ चोलदी, तेई मोके सोठदेआ छाती लागी जौलदी ॥२॥

चौइतर म्हीना नोवां संवत शणाऊ लागी जातरा चचौली टक रेढी नाती मेलीदे ।
 चेच ता तुआर वासु नामैरी जबाड़ी आनी ठिरशु ता विरशु वशाखा देऊ खेलहीदे ।
 चौलै लोका लोकणी बी बणी ठणी शौकणी खोडा खोड़ी होसदें ता थोसीदे भरेलीदे ।
 भांता भांती होंदी हाटी देउ खेला जाचा नाटी खांदे पीदे नौचदे ता ढीसीदे मड़ेल्हीदे ।

अंदै ताल मेरे बोली कपके नी भेली दे ॥

जबै लागी साज बेजी बीड़े रोटी तौलदी, तेई मोके सोठदेआ छाती लागी जौलदी ॥३॥

लागा घनेजेठ शादी शिरदें रा काहिका ता सौंज वणजार वाली लारजी री जातरा ।
 औरली सराजा कुलू लागै अंदे बाजो जंढी पोरली सराजा होर मण्डी री शबरातरा ।
 नाती साती मेल, देऊ देवते री खेल पूछ जाचो रे तमासी पाहुण धामकी री खातरा ।
 मेरी जाच घोर जौ वूणने ता मौंडणे बे पलमे रा पौहरा संघे वासती री वातरा ।

रात रात रोंदीऐ मैं शौगी केरू साथरा ॥

लोका जादे जाचा हाऊ जादी जीमी होलदी, तेई मोकें सोठदेआ छाती लागी जौलदी ॥४॥

शादा जाचा भूईण टकोली सौरा नाउली न शोइर पछोवा हाजी न्याह नीछेकू आणीऐ ।
 वासती थी नीडणी घुआला रोह होलने बे रोपैता रियाट रोहै शुर्क बाभी पाणीये ।
 केरनी थी रूहणी जुआरें लोड़ी बाटा मजदूरी संघे भौत तोपु शादें सौतु खाणीये ।
 भेड़ सूजी शौभी मूर्ई दूआ देदी गाई शूकी गुरे बोला चेदू केरू जामकी जठाणिण ।

राजकी गराही एदा शाहूकार जाण्हीऐ ।

बशंग केरा खटी हाऊ कोसी न नी डोरदी रीणा आली भौखा लागे छाती लागी जौलदी ॥५॥

शाउणा वसांत छूटा गाश घ्याइरात पोऊ चोड़ा बडे छापरें रं पोट थी दुआंडरें ।
 नाला आऊ होड़ देका ल्होसणे रा बौद संघे मू डी-मूडी घाह हुआ छौली घामा जौंदरें ।
 खूठा हुआ चीकड़ ता पकें बोणा पकड़ ऐ नौवी तोड़ा आली टेपें गोरू मेड़ा हांभरें ।
 म्होखी रा मखोण पीशु मांगणे रा फौण हुए सेदा लागे सीन्हे सीभ साथरें ता मांदरें ।

साल खाणी शाही चाही सेउखाऐ बांदरें ॥

लागी जेगे नासपती टपा-टपो झोलदी बरोबादी भालदेआ छाती लागी जौलदी ॥६॥

शाउण टपाऊ साजा भादरू रा खाऊ सीधी मने देवी देऊ ता ठराई रौंडा डाईणी ।
निहाई बी: केरू चोखा नाऊ होमापुछ पाई बोलु देवी अंबकै ज आगो नै नी दाहिणी ।
लागी आऊ सरग बी रुड़दा ता चूड़दा बी पीऊ जोर कीमै रा टपाई जोचा शाउणी ।
फौलो रै ब्यारी लागे तोपदै धुआर माल लेखा स्हाव एंदा नी नपोढ़ हांऊ दियाउणी ।
लूणने बी घाह् हुए नीडणे बी माह साजा शौइरी रा फाह् कदै जानू हांऊ पाहुणी ।

शौइही रं गीड़ै दीड़े कौने हुई टाउणी ।

बैठी जै मशीना आगे केलही घाना दोलदी तेई मौकै सोठदेआ छाती लागी जौलदी ॥७॥

नौठा साजा शौहरी तुहार फीकी नौईरी धूपे पोए चटकदे दोहड़ पोहू ताड़ने ।
हुए वेल्है देउली शरावा मुरा चाकटी न नशे पीछै ध्याड़ै ठउए चिधिए बगाड़ने ।
बाभा सा शर्कीणे नै ता छौली हुइ चोड़ने नै दाहू डाहै चुंघिए ता खोड़ रौहै भाड़ने ।
हाली जाणा सौहरा पोरै, दशमी नै देवी सीधे छेकं जै है छांदी छेता होलने ता धाड़ने ।
एक रात म्हले ध्याड़ी दशमी न दैवी आगे रौहै कला केन्दरा तमासा मीलू भालने ।

लोके लाए रात ध्याड़ होलिए नबाड़ने ॥

केल्ही लागी द्वासीदी ऐ कुछीबीनी फौलदी खाली फाढ़े बेटड़ीरी छाती लागी जौलदी ॥८॥

दसमी टपाई काती धाने री लणाई कोठा छौली रा फड़ाकणा छलाठा रौह लूणना ।
चु घणे नै कोल्ह वाली लूणने नै माह रौहै बाथली रा धान रौह मोंडणाता पूणना ।
रौही काया राजी तो टपाऊ बूभा सड़ासड़ी कौमा रौह्णा लागी बोहू वेशणा ना हूणना ।
तूसी बी सा लोड़ी बीणा काया रा धियानडाहू जानी पीछे करड़ा बी पौई जांदा शुणना ।

आमा दूही ताणे बाणे घृसत सा बुणना ॥

जबै लागी सुपने न जाड़ माड़ भालदी तबै सँई भीखा लाये छाती लागी जौलदी ॥९॥

मोंधरा न बीभै तोयै सुढ छीड़ी ढावणे नै गाशा सीधे लागी जाणा हीऊं यारा पूणदें ।

गीठे फेर खांद पींदे कीलदें मसादें गांदें कथा वाता लादे एका होरा चुप गुणदें ।

टुप टुपी उठिए ते साथरै न तूरी जांदे गुण गुण केरदेया गलाबाता दुणदें ।

खहैं लोमी राती मसो चाछड़िदें काटी मै ता ढालदेया चीणदेया भेड़दें ता बुणदें ।

तेई मोक्रे अकल सारोथा मूबैकुण दे ॥

मसो कसै चिणनी सो भीत लागी ढोलदी तेई मोकै सोठदेया छाती लागी जौलदी ॥१०

पौशा लोगीदयाली लाई नेसरुए गाली जने बाजे सीधे लाए लोके टपी चुड़ चुड़दें ।

बकी बाकी शोहरू एदें गीठे पाधे दुकी पौदे राती तीये दयाली न थी शौली प्याशै हूरदे ।

छीपी छापी व्याली खायो गला बाता गुणी लाये होछें बडे लागी जने साथरै न तूरदे ।

होसदे खलांदे एका खीता खीती लादे कोई ठठे ठठे भोटीदे ता मनो - मनो भूरदें ।

कोकंडी न मेरे लूण पिपली बरूरदें ॥

भालदेया कालजो न ओग लागी बोलदी, तेई मोके सोठदेया छाती लागी जौलदी ॥११

आऊ साजा माघ शेला खांदा जंढा बाघ हीऊ गाश बारी देंदा नी ऐ कौम कढे केरना ।

माह डाहै टालीये ता धान रोहू कूटणे नै खिचड़ी नै घीऊ लोड़ी चौपड़ कढेरना ।

साधू भाट हाली ग्वाले होरा कई जूबा आले कड़ाहू चौऊ पोथी आला लागी जाणा सेरना ।

ईना पीछे जाणे नै नी ओरें पोरे जूबा देदे देउली न मिलदा तमासा बी नी हैरना ।

तंढा लाऊ हीऊं गाश भला भलो पेरना ॥

ठंड लागी दाही लाये जौघा लागी शौलदी काया लागी टडीदी ता छाती लागी जौलदी ॥१२

टपे गौतरी दसंत शिवरातरी नी रोह अंत फागणे रे महीने जाचा फागनीरी खुलदी ।
 फूले पलम बदाम चंदी शई री बसंती सेरी होली लागी घोरा बोणा बुध लागी भुलदी ।
 बीजा गुड रे गड़ाकें गाशा शौर रे तड़ाके फूटें छूछरू कनिफडू वनकशा बी फूलदी ।
 लाल घीशे लाये पेटं सेरी न बदाहुली बराल होखी आली बोदी भगो टुल टुलदी ।
 आपू नोठे भूडी होली मोउजा न छूडी इसो हाऊं सूढा छीडी पीछें बूडी हुई रूलदी ।

केल्ही हाऊ हाली सैवी बंजरा वसूलदी ।।

हुई जवे बेबस ता हीका हीथा मोलदी तेई मोके सोठदेमा छाती लागी जोलदी ।।



THARHARDU

❀ भरियालै री बधाई ❀

बधाई सीभी लोको हिमाचलओ मदानो भाईओ,
 मनी आसो जाच ओज एंदे भरियाली री ।
 जूणा लोक पूजे ईसी धामै रे गदोडुऐ दे,
 तीना होणी रोश आशा हिमाचला आली री ।
 बिहार ता बंगाल मध्य-उत्तर प्रदेश हरियाणा,
 राजस्थान पंजाब पटियाली री ।
 गरमी सा गाल तीना लाक आली लोका तौयें,
 शाहा घोटो दे दी लूऽ धामै रे बुआली री ॥ १

देश म्हारा अढा जोखो छोहै सीता होंदी आई,
 गरम सा बोहू जाँ: लाका हिन्दुस्ताने रा ।
 एसे गलै गरमी प्रधान देश गौनिया सा,
 गरमी रा स्वागत रू आज सा जमाने रा ।
 धाम जै नू होऐ बरसात बी नी होणी तनै,
 बाझी बरसातीऐ नी ना रोहणा धानै रा ।
 एसी गलै गरमी रा स्वागत सा बार बार,
 एंदी जांदी रोहा सा ऐ नीम भगवाने रा ॥ २

आसो यारे हिउंदे री नाम जाचा मने केरी,
 मूंडो मूंडी हीउ म्हारी मूंडी पांछी बेशा सा ।
 कई कई घ्याड़ें द्वोर घावड़ने बी कठणता,
 धूपी रा नशाण नई जाऽ कोस देशा सा ।

माण्हू गेठें फेर गोख भेड़ा खूड़ा हूड़ुऐ दें,
 हीऊं काटी काटीऐ ता माण्हू घीरा पेसा सा ।
 झंडी जूनी बी या सौंघी काटिआ सा हिउंदता,
 तने बी निहाल आसा तेईरी हमेशा सा ॥ ३

सीध रीता ठबें ठने लोड़ी एंवी जांदी रोही,
 एसी गलें सदा रोहा सभा बी सखाला सा ।
 चूड़, चूड़, वासत भयलि लोड़ी छीने केरु,
 चूड़दी वसति लोड़ी काती घपियाला सा ।
 हीऊं गाव पोशा मोघा लोड़ी सदा साल आऊ,
 जोस गले बरतिया बाधरा नुमाला सा ।
 आपणा नी जोरा किछ माण्हू गोऐ देवश,
 जंडा डाहै मालक ऐ तंडा रोहणू आला सा ।

THARAH KARDU



दाह २५

दाही रें नां न बिदरा डोरदी दाह सीभी री बूरी ।

आसा बेवशें रा जीण सा अंडा दाही बाभो नी पूरी ।

दाह माण्हें रें बांडे न पौई री आसै दाही रें बांडे ।

चाहो होऐ सौ पींडे री दुखे री, चाहो मनने री भूरी ॥

मनै री बेदण २६

फींफरी पांखणी फुकुई दीवें न कौम नी आथी सखाला ।

जेवड़ी दाह सा जौसरें मना न तेबड़ी उथड़ी छाला ॥

बजोगणी री चीठो लाडै बै २७

होर हाऊं राजी बाजा खांदी पींदी पोलदी ।

कोई मौकें सोठदेआ छाती लागी जौलदी ॥

सूही मेरे बभिया जी उंबरें रें संधिया, औज आई चिठी हाऊं कदकी निहालदी ।

घोरा हाऊं राजी बाजी टांटी टोर तौती ताजी छेत खौला खटदी ता गोरु, भेड़ा पालदी ।

दाहुई कौ दुखी नई नांगी शोखी भूखी नई माड़े मनै कदी कौसी सरधा नी भालदी ।

एक दाह कढी जेही हांदर न निकलिये कोई समें लागी मेरे कोकडू बै जालदी ॥

रौहा तो सा मनी रामा ठगदी ता टालदी ॥

पर जबै संधणी वियाहू सौघ चालदी ।

तेई मौकें सोठदेआ छाती लागी जौलदी ॥ १

हीउंद धियाड़ा जबै गाश पाणी शेला पाला हीवें रा फरुहरू कदी पूणे लागे पूणदें ।

गेठे फेर पींदें खांदे कौतदें मसादें गांदें गला बाता लांदें एका होरा चुप शूणदें ।

टुपा टुपी उठदें ता साथरें न पेशी जांदें गला बाता केरदें ता दुख सुख दूणदें ।

खहूँ लौमी राती मसौ चाछड़ी दें काटी में ता ढालदेआ चीणदेआ भेड़दें ता बुणदें ॥

तेई मौकें अकल सरोआ मूं बै कूण दे ॥

मसौ कसौ चीणनी सौ भीत लागी ढोलदी ।

तेई मौकें सोठदेआ छाती लागी जौलदी ॥ २

पोशा लागी चाली लाई नेसरुए गाली जब बाजै सैधे लाए लोकें टपे चुड़ चुड़दे ।
 बकी बाकी शोरु एंदे गेठ पांध, छीपी लेंदे औधी राती बाहीए थी शौली प्याशें ठूरदे ।
 शेलें बौंदा जीकदे ते औगी भेटी सीकदे खेल्हुई पटी किए थी शेलें दूँइ लूरदे ।
 छीपे छापे ब्याली खाई गला बाता शूणी लाई होछै मोटै लागै जब साथरें न तूरदे ।
 होसदें खलांदें बी एका खीता खीती खांदें कोई ठठै-ठठै भौटीदें ता मने मने भूरुदें ।
 कौकड़ न मेरे लूण पिपली बरूरदे ॥

भालदी रें कालजै न औग लागी बौलदी ।

तेई मौकें सोठदेआ छाती लागी जौलदी ॥ ३

टपे गौतर बसंत ठाकू शैला बेटी खंत किछ ध्याई लागै खुल्हदे ता धारा लागी खुलदी ।
 देश फीर लाल शैता शार्दरें बसंती छेता छीटा साही राँगुआ ता बुध लागी भुलदी ।
 बीजा गूड रें गडाकें गावा शौर रें तडाकें फूटै छूछरु कनिफड बनकशा बी फूलदी ।
 लाल घीरौ लायी पेठै सेरी न बदाहुलौ बराल हौखी आली बीदी भगी टुल टुलदी ।
 बौणान वरम फूलें किकर खनोर खिलै पीउली पठाज्जाली बागर जें भुनदी ।
 आपू नौठे भुड़ी होलौ मौउजान हूदी इसै हाऊछीड़ी सूढ़ी पीछै बूढ़ी हुई सलदी ॥
 केलही हाऊ हाली सैधे वासती वसूलदी ॥

हुई तबौ बेवश ता हीका होथा मौलदी ।

तेई मौकें सोठदेआ छाती लागी जौलदी ॥ ४

सौघी लागी होली फागा फागली रा समा लागा जाचान चचौली टकरेड़ी नाती मेलीदे ।
 कूलू लागौ विरगु सराजा पोरें ठिरगु निरगु निर्मडता जबड़ी देऊ खेल्हिदे ।
 चौलै लोका लोकणी ते बणी ठणी शौकणी खीडा खीड़ी होसदें ता थोसीदें भरेलीदें ।
 भांतो लागी हाटी देउखेला जाचा नाटी पींदे खांदें नौचदें ता ढीसीदें मडेलहीदें ॥
 अंढे ताल माल मेरे कभवी नी भेनीदें ॥

ईना ताला भालदेआ हौखी लागी शौलदी ।

तेई मौकौ सोठदेआ छाती लागी जौलदी ॥ ५

निहारी रातीऐ

कालटी रातीऐ तेरी कमाई ।

“तेरै चलितरा भालदे मांदिऐ, रात नी सूता ता हीख नी लाई”

खसमा साम्हण राणी नरोलं, रो, कदी नी कौसीन शकल रिहाई ।
सूरज व्याहूऐ जोतड़ टपू, मंतरै मंतरें प्रगटी आई ॥ १

केरु निहारा तें चौंउ कनारे न, प्याशा बखाइआ पीछें सकाई ।
आऊजां देउर चंदर मामा, फीरी पियाशी ता खिड़ खड़ाई ॥ २

सन्हका मारदें तारे नगौणे, एकें ता ऊजें न छालहा बी लाई ।
चंदरा भालीऐ कोई पतारुऐ, एका ता बुझणा घौर जुआई ॥ ३

धीरी ता होऐ तू एणे दे व्याहू, नई जै तेरी में चुगली पाई ।
आपणी खाखीऐ बाणली सची, चाहो तू कसमा केतरी खाई ॥ ४

चंदे रें गोरें गलोटन कालख, काजल तेरा सा पक्की गुआही ।
सुखें रा तौयें निहाली थी लोकौ, लींढा ता चोर री साल पकाई ॥ ५

भुं बड़ू बाटीऐ ठूरी ककटी, तेरीहै नदरी ठौकणी लाई ।
डिमकी नोली ते रामशौरें, पीछें न ठूरदें उंबर खाई ॥ ६

जेतरें नाढ़ ते बालान तेरें, चोरा बै मौउजा साधः बै फाही ।
धाचुऐ तेरें सी ऊंबलें काउड़ें, ऊलू शियाली ता घाही ता शाही ॥ ७

हुआ जै लाड़ें रें एणे रा बीगत ठंडुई तेतरी सकपकाई ।

गोभुऐ लींढ पतारुआं देउर, आपू बी फिरदी फुलदी शाई ॥ ८

मरधी केरी भियाणू चमाकिए, कालटी रौंड दुआलिए पाई ।

रोंदें पकारेदे सीभोऐः तूसै हीसू रें ठीपूऐ जीमी शगाई ॥ ९

लुच्चीऐ तौनै बी टकर लुचा, जडें नै तंडा ता भाटा नै नाई ।

खोउ तमाशा बेवशीरा सूरजें घाउड़ी खेला न रात भियाई ॥ १०

बजोगी री दुआसी—२६

कांगड़ धीरला एक अध्यापक छोकरा छुटी काटीए आऊ ता पोरलें सराजा नोकरी पांधे जांदैआ जलोड़ो जोता न दुआसुआ, रोंदा बेठा, हिकटुईए रोंदा रोंदा दुबला पौउदा थी ता तीसैं हाऊं बी चौलूदा थी, तेईरी दशा भालिए छौडी बी नोलू ता पुछिए दसी बी नीछा, मसैं कसै गढेरू, तेई री गल रा सार मैं बोता हौडदेआ अगलै इना टपैं न गौह ।

-पीडा सा औखे सुआस नी आथी-

पुछदे माता जी विथा बै आसरी, चिंधिए आसैं दुआस नी आथी ।

लागात हौडदैं म्हारी की तौड़ी री कौसीरी आसा तलाश नी आथी ॥ १

कूगी ब शौउरु आथी नी सुख री, कौसा बै भूरी री आश नी आथी ।

कौसरी भाभा नी सरगा छुंघदी, आशक तबै निराश नी आथी ॥ २

मन दुआसुआ बोता न हौडदैं, दुआसी री केरी तलाश नी आथी ।

रौह पलेटुई उथड़ैं चांधा न ऐणे रा पूरा वशाश नी आथी ॥ ३

लोहू शकीड ता हाड़कैं निकतैं, पीड़ न तिनका मास नी आथी ।

धीशदैं केतरी रौशी न बाडुई खूहै रैं पाथरा घाश नी आथी ॥ ४

डगुऐ बांकी नुहारा बै भालीए कागदी फूला न बास नी आथी ।

खडी शचाणी सा मनै री बेदण, पौधरा हुरला आस नी आथी ॥ ५

केतरा भेलला फूलै रा माणस, खौरशू बौन बरास नी आथी ।

हुआ परेमी की जौसरैं टैंडै न, लूणके पाणी रा गाश नी आथी ॥ ६

मनै रैं घोटा छनेरने तैं इएं, हौखी न पोरै नकास नी आथी ।

भूरी री दाही न तीछी ता डूधी, पडवा नौई वियाशनी आथी ॥ ७

माण्हू सी मौरा ता लोभी सी जौलदा, लोभा ता भूरी रा नाशनी आथी ।

गौई गशीटदा पीछैं बै कौकड़, सच सा बेवस ऐ हास नी आथी ॥ ८

चतर मसैरी राती-३०

भादर महीने री रात निहारखी कड़कदी बरसाती ।
 हांडे परदेशिया काटणी कंठे तेरे बजोगे री राती ॥
 सरगा शुकिए चंदर भाड़ुआ पूनू बी फीरु निहारा ।
 शौंकी माणू री भाभा बी शुकदी लोभणी लाँदी पकारा ।
 बाहरै लागीरै शुकदै याजीऐ छेत बगीचै ता बौणा ।
 लोभी बजोगी रै कौकड़ू शुकदै गोरु रै शुकदै थौणा ।
 कांया ता कूजै रै कौंडे न बिन्हुई दोहरी बिन्हुई छाती ।
 गाशे रै टीपू बी चुभदै लागै तेरे बजोगे री राती ॥ १
 बिदलू चौलदा रूशिऐ जबै जौ भौरदै लागणा सींधी ।
 काजल धोईदा हौखू रै पाणिए पौरसू पीड़ीऐ बींदी ।
 जाइरु पाणी न भौरई जोका चौलै पतारुई लोका ।
 मीटुई हौखीऐ उठी बजोगण भाली ना शूणिए पींदी ।
 होर का होर ऐ फीरु संसार ता वुध ठकाणे नी आथी ।
 अंग बजोगै री सौहुईनी छीड़ै तेरे बजोगे री राती ॥ २
 बामौ री चीरुई कुरती बांही र टीरदै कांगणू चूड़ी ।
 दोथकी बागर लहसकै लांदी बादला छिड़ंगा चूड़ी ।
 काया र बाजदै हाड़कै पीडै न तिनका मास नी रौहू ।
 पीडै ना पीउली त्रापड़ी रौही ता पाणी न पातला लौहू ।
 रौहू बशाह नी आपणी काया रा चुप सीमितर नाती ।
 भोंगटै घीटी बजोगण काया तेरे बजोगे री राती ॥ ३
 देबतौ राकसा फीरी मनांदीता दुनिया भालिए हौंसी ।
 पीडै री चौई बै सावण मौलू ऐ धोउई नीछी दुआसी ।
 बरत केरिए तीरथ हेरै छिदरै छोदै ता पीपली भासी ।
 हीशी है नीछे जतन केरिए मनान अंग जै बौसी ।

टेपले बणिए खुलदा कौकडु शौग गलोटें ता छाती,
 भीतरै बाहिए पाणी रा ओछड़ा तेरे बजोगे री राती ॥ ४
 बीभीदा सरग शुकदी हौखी उड़दै भालीदै भाजा ।
 भांभी दी धूई री भीतरै बाहरै फिरदा जीउड़ ताजा ।
 लोभी ता शौउकी लोका निहालदै एजदा शोइरी साजा ।
 रोगी बजोगी ता जोलदै खुलदै ढाबदै घाहा ता नाजा ।
 कीजी बै केल्ही बै विजया दशमी कीजी बै शौउज काती ।
 रौही वेवश निहालदी जौलदी तेरे बोजोगे री राती ॥ ५

नुअरै ताल — ३१

ईना ताला भालदेआ हौखी लागी थकदी ॥
 एकी ध्याड़ें भालू जोथ रुशी नौठी चंद्रमे न ।
 बेठी जायै दूर जंढी उडी नौठी फूकरै ।
 एकी ध्याड़ें गूणू फूल औलू जबै धोरनी ता,
 पाथरै रै कालजै रै हुऐ शौउ टुकरै ।
 एकी ध्याड़ें हौखू लागै हौखी पतियां दै आसै,
 एंदै जांदै रौहाम तू मत शुके फिकरै ।
 एकी ध्याड़ें फिकरिए बोलू लूपी भाहिड़ीऐ,
 छंघणे दै एकी घेरै तबै केरी नखरै ।
 अंढी अणहोणी गला हुई जंढी सुपने री,
 फिकरी थी चाछड़ी दी लूपी थी पटीकदी ।
 ईना ताला भालदेआं हौखी लागी थकदी ॥ १
 एकी ध्याड़ें कौली लागी भौउरा बै बोलदी ज,
 तेरै ओठ जूठे सी तू हेरी मूं बै छंघदा ।
 बोलू तगै भौउरै तू मत केरै चांडा अगै,
 तू है छंघ मूं बै हाउं नई तौ बै सीघदा ।

अंठे ठठे मसखरी गला बाता लागरी थी

शूणू पीछे धीरे कोई मसखरा खंघदा ।

तबे कौली भांबड़िऐ ठौकुई थी भौउरा न

बोलू भाल कुण आऊ होला मूं बं चुं घदा ।

एई तहें मेल ता थी हुआ पर डौरा लाये

मनो मनै होसदी ता जाहरा न भीकी दी ॥

ईना ताला भालदेआ हौखी लागी थकदी ॥ ३

एकी ध्याड़े जिदगी रै तड़कदे धूपै पांधै

मिलै दूई चीड़ू खुल्लै सरगा न उड़दें ।

दूणुऐ ना दूनुऐ नाकिछ छेड़ छाड़ हुई

होई गोउ प्यार चार नैन जबै जुड़दें ।

लागी जां दुणदे ता होणी रौंड हौसी पीई

बागर बियाना फिर गाशै हुऐ चुड़दें ।

छुटी गोऐ हौथ जुण चौबै मुलाकाती बै थी

आंगी आंगी लागं दूहै बागरी न रुदें ॥

एई तहें काटुई थी रात सौ बजोगा मौंभै आद रीही धुखदी ता भूरी रौही घुटदी

ईना ताला भालदेआ हौखी लागी थकदी ॥ ३

एकी ध्याड़ें आऊ एक थकीरा मसाफर

वशावां दूई घड़ी एक घुटु पीऊ पाणी रा ।

चैकू तनै बुजका ता टुल टुलै भालदेआ

चौलू पर जंढा तेयै रसता नी जाणीरा

लेईरी नुहार किछ अंढी बेठी मना मौंभै

जंढा कोई माणू हौऐ भूरी पछियाणी रा ।

घोड़े केरी मूरत मशेलै केरी मनो मन

जोस गले चिन्ह रोहें तेई री नशाणी रा ।

अंढा मन बेउरा ता बुध गोई काची जुण एंद सौघे एजदी ता जांबे सौघे सिकदी

ईना ताता भालदेआ हौखी लागी थकदी ॥ ४

एकी ध्याड़े घुलदेआ मल्ह पौउ थाल्है तेथी

बोलू जै ता एक पाली देदा मूंबे होरतू ।

तबै तीवो दसदा तमासा बाजी मागिए सा

पीठ देदा लाई लांदा केतरा है जौन तू ।

जा यारा छोड़ अंढा बोलू जीतें होंदे मल्है

एज दूजी घेरें भी ता बणाई देणा मोरतू ।

घुलें दूजी घेरें तबै पासा पौउ उलटा ता

बोलू तेथी केर अबै बचणे रा धोर तू ।

एई तहें बिगड़ी सौ खेल्ह जीती होंदी बाजी

मल्ह पछ्त इंदा ता बिदरा थी हौसदी

ईना ताला भालदेआ हौखी लागी थकदी ॥ ५

एकी ध्य डें सरगा न तारा पौउ चूटिए ता

एकी खीलों कोल्है फाढ़े मोभं सौ गभेई डाहू ।

बोलू ऐकी चीड़ए बरादरी न छुड़कीरा

कीबै एई बिटलें नै बास यारा देई डाहू ।

कोल्है बोलू दुखी भौघे दुखी नै पियार होंदा

बिछड़ी रे डाने साही आपू आगे सेई डाहू ।

फूला नै ता आपरा सीसिभ लोक हौथो हौथ

चूड़ जुण होखू माटें फाढ़े न सौ लेई डाहू ।

अढे ईना चूटें छूटें बिछड़ें जुआड़ुए री

वीथा तीना बेवरी री कलम नी लिखदी

ईना ताला भालदेआ हौखी लागी थकदी ॥ ६

बेउरा—३२

माण्हू रें हलै न होरी बै तोपद आपू है हया सा केतरी घेर
 होला बी नई की धौरनी पांघें ऐ थोघ नी लागदा देउआ मेरें ॥
 बूझा थी आपू बै लिखदा चिठी ता पुछनू कौसा न आपणा पता ।
 दसदा कौसकी कौखी सा हाऊं सौ छुडान मूं बै जे तोपदा बीता ।
 नां ता भटकी भूली रा हाऊं ता शौलंदी मेरी नी हौडदै लौता ।
 तबै बी हल्ले न ढाबीदा कभक छुडा न आंगी बी बुझिया साता ।
 आपणी जौघे घरेसुआ गारा आपणी जानी रा आपू है मेरे ।
 माण्हू रें हल्ले न होरी बै तोपदे आपू है हया सा केतरी घेरें ॥ १

यारी न भेरी मैं आपणे औप रें आपणी जानी रा बी बैरी ।
 भूरु बी आपू बै हाऊं न मुकता सिभ मसीबता संघणी केरी ।
 आहंकी हौसी बै हौसदै हौसदै रण बीता न जान खपेरी ।
 छुंडा न होला की नई बी होला हादुई हौखी बी हौसवी फेरी ।
 चौलदा हाऊं ता तेई ठकाणे न जौखी जे लोक रें बेशदै डेरे ।
 माण्हू रें हलै न होरी बै तोपदेउ आपू है हया सा केतरी घेरें ॥ २

रुप नुहार ता रंगे री गल की आतमे सरी सा बदला समा ।
 अबै ता एतरा सरो नो पयाड़ीदा हीका न मन की पाथर जमा ।
 पता नी चिन्हनु नई की आपू बै बिछड़ै हुआ सा बौगत लौमा ।
 आपणे आपान निपट आंगी सा पाखला जंढा जे तुमा ता हमा ।
 बुझू थी जौखी जे पुजै ठकाणे ता निक तौ तौखे बी जिऊ पै फेरें ।
 माण्हू रें हल्ले न होरी बै तोपदे आपू है हया सा केतरी घेरें ॥ ३

मनाल करड़ी—३३

हीउंदा निहालदे श्री होऊंरें पुआसैं जीउ
भीउं चीली बीणे ता मनाल होर करड़ी ।
होऊं रें हिमाचले रें जीऊ आसैं जीण म्हारा
हीऊं लोड़ी बोहू सारा आसा नै मकरड़ी ।
आऊ जने उजें न कबल्ला हीऊं बूटी बूटी
तने लागे सोठदे जे गल हुई करड़ी ।
खाइंदा ता माटा गटा रोहिंदा डुआरा मौंभै
एली जे हियाईणी ता देली आसा दरड़ी ॥ १

बोलदा मनाल लागे शुण जोड़ी करड़ी ऐ
चोलाम गराहुँजीरी सेरी पोरें चुगदे ।
जगा होली नांगी जौ गेहूं होले होरे राई
शाई होली फुलदी मटर होले उगदे ।
बोलू तबे करड़िऐ चुप वेशा संघी होरो
नीउल गरो सेरी आसा नै नी पुगदे ।

हेड़ी होले तुबकिए पाशी ता गलेला ढापा
माण्हू होले छापीदे ता कुतै होले घुघदे ॥ २

एक गोउ दुख तूसै हुऐ अंठे बांके चौउ
कुंठान नो जीउ ता परीउ अंठा शोभला ।
सिभ रग चटकदे चिलकदे थेबें साही
होखी पूंजे पीउंले ता डाल पूठा लोभला ।
मूंडा पांघे चोढ़ जंढी कलगी सा राजे आली
बुभिया सी जंढा कोई बादशाह रोभला ।

अंठे तूसे बाँके भोलें भालें सी पहाड़िऐ ता
जीनी रें सी भादर सभाउ सा नथोवला ॥३॥

रूप रंग तूसरा जे मीली जांदा मूँने लोभ
बेटड़ी रा पूरीदा बचाऊ तूसा जानी रा ।
रूप ता शंगार सा पियारा पर पैहिलें ता
लाड़ा जुण मरध सुहाग सा जनानी रा ।
म्हारी जान जाए ता सुहाग लोड़ी राजी
चला आऊ वसुआस अंठा म्हारे हिन्दुस्तानी रा
केरी गल उलटी शंगार धीना मरधा बी
लागा की भलेखा सहाब खोवा भगवानी रा ॥ ४ ॥

ऐहै रूप रंग मेरा बीइरी सा संघणिए
एई पीछे जान मेरी शौंघे पांघे रौ हासा ।
एई पीछे जोता पंथा उथड़ें नगोहरा न,
गोभीदेआ खार भार जूनी वीथ सौहा सा ।
जान माल आपणी गभरने बै रूपा पीछे
जंठा कसतूरी पीछे बीणा दुखी होआसा ।
माण्हू मतलबिया स काणा बीरी म्हारा, कल-
गीरें लोभा पीछे शान म्हाचलोरी खोआ सा ॥ ५ ॥

नाटी आली कलगी न देशी रै मनाल फोटै
टोपी कोटा पांघे मूँडी म्हारी हाली ग्वालें री ।
चोलें टोपे धाड़ड़ें वनारसी दपट्टे, बाभी
कलगिए दुतिया बी रोंदी जोड़ी बाले री ।
हांऊं शोभा तुसरी हिमाचलो रै भाई भीणो,
मुँने जे फटेरले ऐ शौंक सा दुआलो री ।
वीण हुऐ बेशक कनून रोहै कागदा न
फोटी आई जात आसा बेवश मनाले री ॥ ६ ॥

देश पियार—३३

बेटड़ी मरधे रा कठा राग
देशा सेंधे प्यार, म्हारा देशा सेंधे प्यार ।
देशा सेंधे प्यार आसरा देशा सेंधे प्यार । १

बेटड़ी:— वीर बेटड़ी देशे री आसो
मरध:— आसो जोधो जवान
बेटड़ी:— दोसिए मरधा जुधा भेजदी
मरध:— आसो लड़ाई जान ॥ २
दूहै:— आपणी सा सरकार ॥ आसरा देशा सेंधे प्यार
मरध:— मोरदें मोरचें पांघो आसो कदी नी जाणी डोर
बेटड़ी:— खौल्हा छेता ता शोरू गोरू आसो सम्हालै घोर
दूहै:— ढोऊ देशे रा भार, आसरा देशा सेंधे प्यार ॥ ३
बेटड़ी:— जदी कौसिए हमला केरू ढौकी उबली बौत
मरध:— सूतें ब्राथें रा लींघट ढौकू शाधी आपणी मौत
दोनों:— धीनी करड़ी मार आसरा देशा सेंधे प्यार ॥ ४
आसरा देशा सेंधे प्यार

आसै जागै—३५

दूहै:— जागै देशे रें मरध बेटड़ी, देशा स्वारदे लागे-हो
सभी देशा न आसरा मुख लोड़ी निकता आगै-हो
मरध:— उठा कौमा नै मरध गाजिअरी मता सोठदें कीछे
बेटड़ी:— एई देशे री बेटो सी आसो बी कीनै रोहणा बीछे
दूहै:— सीभी मिलिए देशा सुआरना चौला नाटी रें रागै हो ॥ १
सभी देशा न आसरा मुख लोड़ी निकता आगै हो ॥

देश बनाणा—३६

उठा डे भाईओ घोर बनाणा ।

सोई नी रोहणा देश जगणा ॥

होरा जे मुखल जागें थी आघी पौढिऐ गुणिए निकतें आग ।
आसी गलामी न रोहै न भागें नीचणा पौड़ा थी लोकें रें रागें ॥

काल छटेरु सा देश पराणा, उठा डे भाईओ देश बनाणा ॥ १

शौठ करोड़ा सी बौसणू आसै, घोर सा जोजरा बौसणू खासी ।
घोर थी आसरा केली री नासै, लोकें जुआड़िऐ केरीरा पासै ।

बेशका केरिऐ डाहू कराणा, उठा डे भाईओ देश बनाणा ॥ २

आसरे लीडर बड़ै सताजा नौवों विधाने री नौवी रुआजा ।
सिभ सी परजा सभी है राजा राती दियाली सी घ्याड़ी सी साजा ॥

जादी रा पौहिला शगन पाणा, उठा डे भाईओ देश बनाणा ॥ ३

जेतेरे घरम जात बरादर सीभी रा एक बरोबर आदर ।

जात सा माणू ता हक बराबर कोमा मताबक सभाहै भादर ॥

जुष सताज सा सौ है सियाणा, उठा डे भाईओ देश बनाणा ॥ ४

पातला भूंगा कसोथै थी बोहू, कठा नुआड़ू थी लागणा लोहू ।

योजना केरीऐ बुटड़ू रोहू, बोरशा पौजै रा बौगत डाहू ॥

तेजा न एक कसोथा गुआणा, उठा डे भाईओ देश बनाणा ॥ ५

योजना बोलणो कौमै रा तर्हा, बाभी सकीमें नी खोइदा खर्हा ॥

ईना न जूंडीणा शोभली तर्हा, अंढा सा अकली आली रा सर्हा ॥

स्थावो नुआड़ना स्थावो टपाणा, उठा डे भाईओ देश बनाणा ॥ ६

कोम थी पौहि ले जूणा जरूरी, पैहिली दूजी तरीजीऐ पूरी ।

चौउथी पौजा बे लीडरा घूरै, इता सा देश री एबड़ी भूरी ॥

सरगा बूझा सी देश पजाणा, उठा डे भाईओ देश बनाणा ॥ ७

हिन्दुस्तानी सी शौठ करोड़ा, नाजा वियाभदें मुनुआ चोड़ा ।

घोरा थी सारी है चीज रा तोड़ा, सीउणी नाम थी लोका न लोड़ा ॥

लाऊ बेअंता समान बणाणा उठाई भाईओ देश बणाणा ॥ ८

चोऊ कनारें री सड़का हेरा, मोटरा बिजली चोउ चफेरा ।

पाणी रे नलकें दूधे रे ठेरा, जीमी गरीबा न घोरें बे डेरा ॥

डाक मदरस ग्रां प्रमाणा, उठा ई भाईओ देश बणाणा ॥ ९

आपणी जीमी बे खूब पजेरा, बेजा ता खाद पजाड भतेरा ।

भाजी ता नाज बी फील बधेरा, रोजीए खाऽ ता ढव्वे कठेरा ।

केरा तजरबा नौआं पराणा, उठा ई भाईओ घोर बणाणा ॥ १०

शांति संतोषा बे ऐमरजंसी, गरीबा जियाणे बे सूतर बीः ।

अबे भी जागें ता डूबणा भी, एता न बधका बोलणा की ॥

सीभी बेवश रा तहाँ वशाणा उठाई भाईओ देश बणाणा ॥ ११

आसै हिन्दुस्तानी — ३७

आसै भरारु सी शौठा करोड़ा ।

हिन्दुस्तानी सी शौठ करोड़ा ॥

जांदे फरंगिए पाऊ खरोला, होसदें घोरा न पाउ बछोड़ा । १

बौडुए घोरा न खोली न ओड़ा, ओज सा टबर शौठ करोड़ा । २

म्हारा मलेगा सा मनें रा भोला, खटवा बोहू ता दूणदा थोड़ा । ३

आसै नी मारदें फोकी लपोड़ा, कौढिए शेटणा नाज रा तोड़ा । ४

पीरटी बाजी रा गिद गदोड़ा, एकी रा पोलड़ा होरी चोड़ा । ५

फीरदें घोरठा पौड़ला रोड़ा, छानीए शेटला हीक रा फोड़ा । ६

बणिए रोहात होथडू जोड़ा, बेवश गेरी रे हाडकू चोड़ा । ७

चीने रा हंवल्ला—३८

उठा देशों रें बेटड़ी मरघ घोरा कुंभल लागा ।

सीम टबर होआ कटेई है, मत भीरा बलागा ॥ १

घोर आसरा हिन्दुस्ताना, मस करो छटेरु ।

तीहा बोरशा भीतरै एतरा, सोथी साथिऐ केरु ॥ २

बेटी गाभरु भारत माता रें आसी शीठ करोड़ा ।

ह्याऊ केरिऐ बणात फौजजी, थोसा बैरी रा चोड़ा ॥ ३

टेंड़ा लागा अब चीनीऐ चोरैरा, आसा लूटदें आए ।

चुप चुपे बडे जोत री भीती न, बोहू कुंभल पाऐ ॥ ४

आसा ठाकणें पेशदै पेशदै, छेकें निकल आगे ।

बुरी मोउतीऐ मोरना पौड़ला, जं ता अबी नी जागे ॥ ५

बडा बुरा सा चीने रा आदमी, माण्हू चापणू आला ।

कोई तेई रा दीन ना धरम, ईना तिबती भाला ॥ ६

मता भूरदै जेउर गहणे, मता ढबुआ धेला ।

रोणा पौड़ला हीकडू भीनीऐ, चीनी लूटीऐ नेला ॥ ७

लागे उठदें देशों रें लोका, चौलें भरती होंदें ।

कनै पुजदें मोरचो पांघो, खांद चीनी बो दौंदें ॥ ८

बडे जोरिऐ आसरें फौजजी, लागें धाकदै पीछें ।

केरा मजत पीछें न, तिनरी, जीऊं फिरती तीछें ॥ ९

छोडा बिदरो जाचा जणितरी, साजै बेजै तुहारा ।

सारी मोउजा छोडिऐ बेवशा, ईना चीनी दुहारा ॥ १०

पंचायती राज—३६

हा: कट पंचाइती राजा

सौंभ पौडिऐ रोज दिआली दोधी उठिऐ साजा । हा कट ०

नईं रौहै अब ठाकर राणे राऐ राजे री खेला ।

जूनी निभारी सिंधी फरंगी री पाले बगारी रा भेला ॥ १

आसे सिभ सी परजा देशे री सिभ देशे रे राजे ।

पाले फिरदै सिभ परेखणे कुण गाजै ता बाजै ॥ २

एक जेहै आज बेटड़ी मरध नईं जातीऐ बडे ।

तेहै बडे जुण देशा गरां न होथ जोड़िऐ खडे ॥ ६

राम राजे रे गांधी रे सुपने आज हुऐ ते पूरे ।

राज बणे अबै सभी गरां न जुण लोका बै भूरे ॥ ४

फाटी फाटी सरकार बणाइऐ हुआ देशे रा भला ।

तर्हा केरना आपणे लाकै रा म्हा रे होथरी गला ॥ ५

होछ होछणू राज बणाइऐ सीभी लोकै रे जीम ।

राज केरना दसणा सीभी बै एसो बांकी सकीने ॥ ६

ग्राबां फाटी री होछी पचाइती व्लाक समती बडी ।

जिला परिषद तीना न बडी बडी गला बै खडी ॥ ७

एकी राजा न एक असेंबली केरी देशा न सारे ।

राजा भीतर कनूना सुआरदी इंतजामा बै म्हारै ॥ ८

लोकसभा सरताज पचाइती दूहै पारलीमिंटा ।

सारे देशे रा भला व चारुदी नईं आसा बै चिता ॥ ९

एई ढंगे रा राज पंचाइती नेता लोकै बणाऊ ।

अबै गल सा आसरै जीमे री ठोक लोड़ी चलाऊ ॥ १०

माण्हं छांटीऐ पंच बणाणे जे कुण रांभडा खोटा ।
 जात ब्रादरी आपण पोपण छोडी भोरनी बोटा ॥ ११
 जुणा बणे परधान ता पचा केरें बिदरें प्यार ।
 धोखा केरलें बिदरा सौंघ ते लोडी आगी बी हारें ॥ १२
 जीतें ना हारें चिधिऐ किजी बी फीरें प्याश निहारें ।
 बंदो बसत देश केरदें आगे पिछले ज्वारें ॥ १३
 आद डाहणी तदकी रसम जुण कसमा खाई ।
 लाके मुलखी री लीइए लोडी मान दारी नभाई ॥ १४
 न्याऊ केरदी न्याय पंचाइती बाभी टिकटे फीसो ।
 पंच ग्रांए रें जाणा सी मांबले भूठ सच सा कीसो ॥ १५
 होछी खाखीऐ बोहू की दूणनू गौऊ माण्हं बेवशा ।
 कौम केरा अबै देशा बणाणे रा सोठा पिछली दशा ॥ १०

बेटडी पंचा—४०

राज पंचाइती लागा मांदीओ राज पंचाइती लागा ।
 देवा छोपदी डाबुई ओज कूलू घोरें री भागा ॥ १
 ओधी दुनिया बेटडी बोलणी ओधी मरधा लायें ।
 डाही बेटडी बाँचिए फिरलें कढे देशे रें भागा २
 नोबीं बणी सरकारा ओ मांदीओ नौवे बणे कनूना ।
 हुए हाकम बेटडी बाई के भाला म्हारें दमागा ॥ ३
 धौणी बाईके बेटडी मरध सभ घरमा जाती ।
 एकी छाटे रें मणवी सिभता मौंभै मुलख धागा ॥ ४
 काया पलटी हिंदुसताने री फीरु निहारें रा प्याशा ।
 लोके कूलू रें दिल्ली न जाये बाजौ नाटी रें रागा ॥ ५

नई रोही अबे जौवै रै पीलई माण्हू गोणुई आस ।

बणे बेहणी भाई बराबर फीरें आसरें भागा ॥ ६

हुई भादरा दुरगा हलियाबाई भांसी री राणी ।

विजै लछमी इंधरा गांधीए फूकी बैरी रीफागा ॥ ७

धीनी अबे पंचाइत मिबरी भारत सरकारै ।

औज बेटड़ी गोणुई माण्हू हुआ देश चुआघा ॥ ८

द्रोही केरीए केराम न्याऊं बै नई तरफदारी ।

वारे हेरदा कौशू नराइण पारे माहुटी नागा ॥ ९

बूरा हेरीत बूझदे मरधो आसें मजती आई ।

रली बणीए लाका बणाणा सा जंढी फूलै री बागा ॥ ११

साड़ी जेही मूं माण्हू बेवशै रीशू णा गल न मूली ।

न्याऊं केरीए भारत माता रा होला सदा सुहागा ॥ १२

छुंघ छेड़—४१

छुंघा छेड़ै रै बहमी लोको सारी दुनिया हेरा ।

कलिजुगा नबाड़िऐ आऊ सतीजुगै रा फेरा ॥ १

लमं चौउड़ै एई संसारा न शौउ शीठ सी देशा ।

सारें लोकां सी एक बराबर चाहू कोई बी भेशा ॥ २

खोई लागी म्हारें हिण्डुसताना बै बोदू घमा जाती ।

गला गला पीछे बौजिए डाहैदे सोरै टबरा नाती ॥ ३

एकी गवर मिटै रै गाभरू भगवाने र बेट ।

सोरै भाई हरिजन सवरण कीबी केरने फेट ॥ ४

फेटे करै जुण आपणे घोरक वणे बेशरी सारै ।

औधा मुख बौडिऐ पाऊ लाऐ घौरा न आरे ॥ ५

रूप रंग सी एक बरोबर एक जेही नुहारै ।

मोथे बांधे नई कोसी रै लिखी रा कुण खरै ता माड़ै ॥ ६

जुण माण्डुए बाहंका केरु नई देखा बी बुरा ।

देऊ एजा सी बाहंको भीतरै तबे बणा सी गुरा ॥ ७

कुन बौसुआ शौठा करोड़ा न पंद्ररा करै न भागै ।

एकी जौव रा फाखरा मुख कंठे सीकला आगै । ८

जे नाम थी साधु महातमे देशासधेरदं आऐ ।

ऊधड़ै नीशटै हिन्दु समाज कौम तीनरै गुआऐ । ९

ऊधड़ै नीशटै छेत कमोणे बी जंठे होआ सी बूरै ।

तौंढा बिगड़ू आसरा मुख जाती पाती कसूरै । १०

शूची खाईणू आली चताणे बी, बाहंको लोको रा एका ।

हरिजन नां गांधीऐ डाहू नई कोसी रा ठेका ॥ ११

कौम केरदं बाहंकी जाती र, रौहै बाम्हणा शूची ।

छोड़ू बाहंको आपणा पेशा बी नई गौणुए शूची ॥ १२

धीनी ईना बी कीनी रिआईती पीछै बाहंको रौहै ।

भेद नई सरकारा बी कोसी रा खर खोटै नी कोहै ॥ १३

पौजा गूठी साही एक बराबर आमा बापू बी भूरी ।

घाटा केराम सोरै भरारू बी तीना लागणी बूरी ॥ १४

जाइदात जुण बापू री सीभी भाईरा बांडा ।

हेसा बेवशा भाउ रा मारिए नई घौड़नी चांडा ॥ १५

पचाइती रौबली लोकसभा री मिबरी नंबर दारी ।

धीनं मर्जाफै ता शोहर पौडिऐ डाही नोकरी न्यारी ॥ १६

दसा बौरशा न ठीमको लोड़ी जूणा आगै सी लोका ।

पौड़ी खटीए ठीमका आगलै छोड़ा नशै री पोका १७

आपू मौंभ रौहै उथड़ै निशटै औजा तौयें सी जंठै ।

एका नई जबै आपू न बाहंको होरा मिललै कंठै ॥ १८

ढौत—४२

सूतै दे भाइयो द्वार घुआड़ा दुनिया नागी आउधियाड़ा ।

घुणिए भलै री गला फिमाड़ा उठिए आगला कौम नुआड़ा ॥ १

उदमी लोका ता पहिले जागे छेता ताखीलै रें कौमा न लागै ।

सोइआ रौहैदे आसी नभागै लोका ता निकती केबड़ी आगै ॥ २

पेहिले छोड़णी गंदी रुआजा रांभड़ै मनणे जातर साना ।

नशै न खोणे नी बीगत नाजा खटिए छपिए बणना राजा ॥ ३

शोभला देश सा पौजणू माटा खटणु आलै बणाउ रियाटा ।

सेरीन नाजा ता ओकती फाटा कौसीनी चीजैरा आसा बे घाट ॥ ४

गूगल धूप ता कौडू पतीशा शौठ जलाड़ो ता कौकड़ी बिशा ।

शिगली मिगली भौरुई दिशा कोतदै उठणा केरिए रीशा ॥ ५

दुख दलिदर धीरनी बीथा उदम केरिए जिंदगी सोथा ।

बेवशा दूणदा जोड़िए होथा आपणी कलमे लिखणा मौथा ॥ ६

रछ-बणाहड़ी-सप्ताह—४३

हौथ खडी रा हफता लागै डे जागे सीदे शै रें भागा ।

केरा चिकट कांघी बरुएं बै सारे बणाहड़ी जागा ॥ १

म्हीन कपड़ा बूणा थी शोभला म्हारा हिन्दुसताना ।

कौन्ही गूठी री मूंदड़ी निसरै मल मलैरें थाना ॥ २

हौथ कोतिए बूणा थी घोरान म्हारे कूलू रें कोलै ।

मूठी ओपड़ें चाधरु बूणा थी नालू ओपड़ें चोलै ॥ ३

धन म्हारैआ कूलू रें मुलखा हौथ रछें रें देशा ।

सिभ बुणदे पंडत ठाकर नई बाहंका पेशा ॥ ४

घोरा घोरा न ऊना कपाह थी, घोरा घोरा थी कोता ।
फोना बूणा थी पूंवे बणाहड़ी, छींवे फेरा थी शेता ॥ ५

जबे नोरें लागे फोनदे बणदे कारखाने मशीना ।
फोरें पूंवे जलाहू नकारे डे जीणा कीजिए ईना ॥ ६

शौउ सैंकड़े माणू रा कोमता एकी माणूए थोम्हू ।
मारु रिजक जीना गरीबे रा तीनरा कौकडु कोम्हू ॥ ७

एसा गला फिबाड़दे जाणदे कांगरेसे रै नेता ।
होथ कौतुआ खदर लाऽसी छापू रौंगुआ शेता ॥ ८

एई हफतें रा मनशा अंढा सा होथ बुणुआ लाणा ।
जीण देणा बणाहड़ी पूंवे नै तहीं तबे बशाणा ॥ ९

कंढे शोभलें बुणद लागीरें, रंगदार बणाई ।

जीण सोयुआ बुणनू आलें रा, जबे लागी कमाई ॥ १०

दूर कीजी बै घोरा न हेरात, होछ होछणे शोरू ।
लागे बुणदे शोभली शाला ते, जूणा चारा थी गोरू ॥ ११

शौऊ सैंकड़े लागी रें रिजका, जूणा गरीब लोका ।
बेलहै फीरा थी ढबुए खेल्हीदै, नी ता मारा थी पोका ॥ १२

म्हारें देशै रा कौतुआ बुणुआ, मनु सारें संसारै ।
होथ खडी री दौलत अबे बी, चोलू समुदरा बारै ॥ १३

जीना लोकै रा रिजक निभु थी, तीना बेवशै री तीयें ।
होथु कपड़ा केरू रिआइत, सरकारे गसीयें ॥ १४

मशीनी खाद—४४

गूणा कूलू र संघीओ जीमीन भौरा खाद मशीनी ।

थींधी फेरा सा पौजणू जीमी बी जंढा चोपड़ चीनी । १

भूखी रौही जबै माण्हू री काया ता बाहें एजा सी दौना ।

भूखी जिमी बी भौकरी फीरा सा पौजा किछ नीं होंदा ॥ २

पहाड़ी जीमी सा रूसा मरीकें बी पौजा पदरा गूणा ।

धीनी जीमी बे पूरी खराक ता केहू खेऊ बी दूणा ॥ ६

जुग लागा अबै साँइसी आलै रा सभ गला सखाली ।

जूनी गोभुई आघली समे री मूंडा साम्हने भाली ॥ ४

डाकधरै ईने साँइसी आलै ए सारी चीजा फियाड़ी ।

जूणा चीजा जौखें घाउड़ी फीरी तेहै तोखी पियारी ॥ ५

घीउ घटु ता डालडा बणू काया फीरी बी थींधी ।

मौल घटु ता खाद बणाइए बाभी गोरुए सींधी ॥ ६

घौणी बौसुआ भौरुई देशान जीमी तेतरी रौही ।

पेट पौजणू बांढी जमीना ऐ गल सोठणी पौई ॥ ७

भौरा मौल ता घाह दहबड़ा गढ़ पाय चकेरा ।

माटे खोटिए भरकू जबै तेयै छेतान पेरा ॥ ८

थोड़ी घणी जौ कसर रौही ता पाणी खाद मशीनी ।

मसौ कसौ ईने साँइस दाने पैदा केरिए धीनी ॥ ९

नीबीं चीजा बं घौड़ा सी चांडा आसौ कूलू रं लोका ।

सभी कोमा बी भूका सी पीछे न जनै फोरै पराणे ॥ १०

भूरी दाह मू बै आपणे देशे री गोड माण्हू बे वश ।

लोका गोए आसौ जफड़ नीरै तबै लागी कदशा ॥ ११

बौणरी फराध—४५

म्हारें देशें रें भाइमो कथा बौणो री गुणा ।
 कथा गुणिए नीहचें सेंधें मना भितरें गुणा ॥ १
 बौणा लाए परमेसरें आसरें जढी नाजो री सेरी ।
 बौणा बूटीए आसरें देशी री वडी रछया केरी ॥ २
 ईना बौणो री दोलत आसरें पोए बाजो रें कोठे ।
 जबै ईना नो काटिए शोटाम रोणा लैबडें ओठे ॥ ३
 गाश पाणी कुल बौणो री दोलत सेंधे ढोका सी माटा ।
 माटा इडिऐ नाला नो जाना ता जीमी होणी छणाटा ॥ ४
 बडी माल सी आसरें देशी री फोला बौण रें बूटे ।
 एई धने री दोलत आसा नो मीलो सुखी रें भूटे ॥ ५
 काठ कूणिए घोर नी चीणना काठ ढाले रा लाणा ।
 बोहू लकडी लाणी सा जंढा जो मास आपणा खाणा ॥ ६
 दादे बागो जुणा बूटी टकाई तेकोमा आसरें आई ।
 आसी आपणे जाए री तौइए होर लोडी बधाई ॥ ७
 गल एतरी बोहू की हूणतू गोऊ माण्हू बे वशा ।
 होखी मीटीए काटाम बौणाता होणी म्हारी कदशा ॥ ८

खबदार—४६

निभदे लागे बौणा लोको फिटदे लागे बौणा ।
 आपू ता जिए थी रांभडें ता आगले खाचान पोणा ।
 नांगे केरले देशा नो तबो सा खडी बांही एं रोणा ।
 बौण पौडदें पातलें लागे देश फिरदा घोणा ।
 भांडे घोरें रें बेचिए जंढे लाऊ ढुअ्रा कमोणा ।
 बौणा निभिए मुख यारो पोणा छाणकें छोणा ।
 बुटें रोहात पंदरा तबो एक शोहरू जोणा ।
 नई देश बेवश जुआडना लोहू पाणी न घोणा ।

नशा—४७

शुणा माण्डुओ सारें संसार रें, मता केरदे नशा ।

नशा केरिया जानी री मालें री, खोणी घोर री दशा ॥ १
मिलू जनम माण्डू रा आसा नै, सीभी जीवा न खरा ।

जीभ हुणदी अकल सोठदी, होथ कोमा नै हेरा ॥ २
सारें जीऊ सी माण्डू रें वशा न, ऐसा बुद्धि रें जोरें ।

ऐसा लायें सा माण्डू री तागत, भालू ब्राध बी डोर ॥ ३
ऐसा बुधिए भालात माण्डुएं छूंधै सरग तारें ।

कंठी-कंठी बणी कला मशीना ता बडें जीउ बी हारें ॥ ४
नशा मारा सा माण्डू री अकल, बुध फेरा सा पीछे ।

बुधी मारीऐ माण्डू नी रौहँदा, नई पयाड़दा किछ ॥ ५
भलौ बुरें रा नफ ता घाटे रा थोघ लौजे रा छूटा ।

नशी आलो रा मान न धरम, नाता देवा रा चूटा ॥ ६
गोरु भेड़ा ता बीणें रें जीवा न थाल्है पूजा सा माण्डू ।

तबै रौह सी कीजीरा माण्डू जै भला बुरा नी जाणू ॥ ७
नशा केरीऐ बणा सी पागल जीसै कीसै सी पौड़ा ।

माल दोपड़ी बीसी पटाकी नै होरा लोका सी घोड़ा ॥ ८
भलौ माणसा घोरें रें टबरा सरकार दर्बाग ।

नशी आलो रा इज्जत मान नी, सभी जगा पतारा ॥ ९
एकी घेर नबो माण्डू री खाखी न लागा कोई बी नशा ।

सूर, चाकटी, भौंग, शराब सी केरा माण्डू बेवशा ॥ १०

परुआरै रा स्हाब—४८

जेतरी चीजा पियारी संभारा न सीभी न बध लुआद पियारी ।

गाभरु, बेटी कलेजे रें टुकड़ें दाह सा तीनरी पुठी नुआरी ।

दुख कलेश सा बितरा माण्डुएं भालीऐ तीनरी होसदी नुहारी ।

कीजीनै टबर दीलत कोठी सी बाक्की लुआदिए सभ नकारी ।

संसार सा लुआदिऐ लुआद पै संसार सा ।
हुई बित्ता बाहंती ता बिगड़ा सुआद सा ।

जे नाम बीजा सी पियारी एसा दुनिया न ।

लवाद तीना सीभी मौंभै बधकी पियारी सा ।

होआ बेटी गाभरू सी कालजै रै टुकरै ता ।

भूरी दाह होआ बाल बचैरी निबारी सा ।

दुख ता कलेश काया मन रै बसारिया सी ।

हौसदै जे भाले खिला मन री कियारी ता ।

कीजीबै ते टबर जमीना धन मान सी ।

लुआदी बाभी दुनिया ऐ बिधकी निहारी सा ।

लुआद मनीं दुनिया री पहली मुराद सा ।

हुई बित्ता बाहंती ता बिगड़ा सुआद सा ॥ १

एकी जीड़ी दूहरू रा नौउचा बियाह केरू ।

खाणे लाणे हौसणे रै मजै रै बियाड़े थी ।

एकी होरी घटी नई रौहिदा थी एक घड़ी,

अंदे मन मौउजी न सुखी लाड़ी लाड़ें थी ।

खरा लाणा खाणा ब्याह जातरा न एणा जाणा,

नौचणा ता गाणा मन मजै रै लियाड़ें थी ।

लागा तां एजदा पराहुणा बधाई आला,

हुई किछ खुशी किछ नाक मौथें भाड़ें थी ।

अढी ऐ बधाई साई देऊरा प्रसाद सा,

हुई बित्ता बाहंती ता बिगड़ा सुआद सा ॥ २

तबी लागे जौमदै लंगीर लायै सदा साल,

होर ऐणा पेटा न जां एक हाजी फाड़ें थी ।

पौजा छौहा बीग्शा न जौमै चार बेटे बेटी,

चारे मेढ़े अंदे सारे नखरे बगाड़ें थी ।

चढ़दी जुआनी लोभा चाऊरें घियाड़ें मोभें ।
चेथुऐ ते चारें सिभ पिसरें फियाड़ें थी ।

बालक बरेसा न सौ लोभी जोड़ी बुढलुई ।
नुहार घाट आपणे ता बचे रं बी माड़ें थी ।

अढ़े ता सा होआ बचा बड़ी जायदाद सा ।
जोमैं बीता बाहंतौ ता बिगड़ा सुआद सा ॥ ३

रौही साल घौणी होंदी पीउंली नबोज कम
जोर साल ढौला पौड़ा गल मशहूर सा ।

फोल लागे घौणे जने होणे होछ होछणु ता ।
भारा सँघे डाल चूटी जाणे दस्तूर सा ।

तंडे घौणे बचे होंदें दुबलं नकारें रोगी ।

चोड़ा आमा बापू बै लुआद भर पूर सा

सौहै साल फीलं ता लुआद होणी बड़ी बाकी ।

जुण डाही स्हावै तेसा आनीणा जरूर सा ।

ढालं री लुआदै सारा टबर अबाद सा ।

हुई बीता बाहंतौ ता बिगड़ा सुआद सा ॥ ४

कोई माण्हू बोहू जीमी जगा ता बगीचें आला ।

खांदा पींदा जड़कदा बडा जिमीदार थी ।

गोरु भेड़ा हाली ग्पालौ टबर कमौणू आलौ ।

ढना घेला नाज पोथा खरा घोर बार थी ।

हुई भाई बेटड़ी ता नौऊ जोमैं बेटे बेटी ।

न्हूसा पोचू पोची आला भौरी परआर थी ।

हुई दस बांडा तबै फूटा भौरी भांडा सोत ।

बीधे आला रौहू एक एक हेसे दार थी ।

बची लायै बरकत फोका बकबाद सा ।

हुऐ बीता बाहंतें ता बिगड़ा सुआद सा ॥ ५

घोरु लड़ाई—४६

देश रँ लोको खबरदार फौजजा आई होआ तियार
फौजजी भोखे जंद शलोहै सीभी रँ घोरा न तूरीऐ रोहै
बेटड़ी मरघ कठ पियार देश रँ लोको खबरदा फौजजा-० ॥ १

शार्धे नी तोणे नी आपूहै तूरें खोखन गोभुऐ सूने रँ छूरें ।
होसदं खेल्होदं केरदं मार देश रँ लोको खबरदार फौजजा आई होआ तियार ॥ २

घोरा ब एक ता नाजी रा तोड़ा तीनैरं भेली पजेरीणा थोड़ा ।
कीजिए घाचणे भोख शुआर देश रँ लोको खबरदार फौजजा आई होआ तियार ॥ ३

होरा बलागणे बेशीऐ खाणा शोभला कपड़ाती ना नन्याणा ।
खोखी न पीठीन घूघू शुआर देश रँ लोको खबरदार फौजजा आई होआ तियार ॥ ४

घाचदे पालदे आद दियाई कौम बलागिए जूनी दियाई ।
टबरा सारं री खोई नुहार देश रँ लोको खबरदार फौजजा आई होआ तियार ॥ ५

देंदे नी बेशणे रातीनी सोणे भीतरे बाहरें चौकिए ढोणे ।
करड़ी ईनरी पाला बगार देश रँ लोको खबरदार फौजजा आई होआ तियार ॥ ६

जीमी रा नाज ता काया रा मास खाइऐ केरा सी सतियानास ।
बोगती एतै रा केरा बचार देश रँ लोको खबरदार फौजजा आई होआ तियार ॥ ७

फौजजी कूणा सी केरात आद बीता न बाहंती जुण लुआद ।
बोगती एतै रा केरा बचार देश रँ लोको खबरदार फौजजा आई होआ तियार ॥ ८

पाका ता चीनै री गल सा थोड़ी घोरै री फौजजा ठाकुई लोड़ी ।
मार करारी ना तोफ तलार देश रँ लोको खबरदार फौजजा आई होआ तियार ॥ ९

एता न बचणा नाज करायै अक्षपताला न प्रेशन करायै ।
बचै रा आपणा देश रा उघार देश रँ लोको खबरदार फौजजा आई होआ तियार ॥ १०

खापरो शोहरी—५०

आलीकाया मेरी दूधें रे दौदड़ू जानू मानूएं घेरी ।

मना भोरिऐ बहोसुआ नखेलुआ कंढी विपत्ते पेरी ।

काला तौयें थी खेलीदी पटकदी घौरा बोणा ता सेरी ।

भोर खेला न खोई आमा बापुऐ लोभें शाहूर पजेरी ॥

कंढी शोभली जोड़ी थी डै आसरी लोभ शोभ नी केरी ।

सूजी सूजीऐ ईसी हाऊ लोचुई कोमै जोड़ी थकरी ॥

लोभ चाऊ नी हुआ मरै बचुओ चेना नोलू पगेरी ।

सोठा मंतर आसा बी बचाणेरा गुणा अरजा मेरी ॥

बचणे री सलाह—५१

बची जाणा भाई भी बची जाणा बोबी जी ।

राजी रोगाहाः केरी हाः केऽरी जाणा बची ०

बच जमोणे दूई तराई जीण बणाणा थोरा ही जीण बणाणा धोरा ।

मजै सौंघे ज्याई लेंगे ज्याई लेंगे ज्याई जेम सौंघे ज्याई लेंगे ॥ २

बोहू जेम ता डाक्टर पुछणे लाज कराणा पूरा हो लाज कराणा पूरा ।

छेकें जाई लोणा जाई लोणा जाई छेवो छेवो जाऽई लेंगा ॥ ३

जगान कम्प जे लागदे सीरा कटांदे हो नूपा लुआंदे हो ।

आपू जाये लाई लोणा लाई लोणा लाई आपू जाये लाऽई लेंगा ॥ ४

बधदे चोर री ऐ बरकतिए ढाली लोड़ी दरशण तेरें भलिए । १

स्थाने रे लोड़ी बेटी गाभरू जेमै कीरडू नी लोड़ी टंबरेली भलिए । २

धाची षडाइए माणू बणाइणे दूई ताराई जे जमे रे भलिए । ६

हुए नकारे तबो फौउजा चिधिए कारी रे ता दूई बीब तेरें भलिए । ४



THARAH KARDU

प्रकाशक :—

चन्द्र शेखर बेवशा

ढालपुर, कुल्लू (हि० प्र०)

THARAH KARDU

मुद्रक :- ठाकुर प्रिंटिंग प्रेस, ढालपुर, कुल्लू ।